



Broj: 02-04-2053-2/25
Sarajevo, 23.01.2025. godine

Na osnovu člana 26. i 28. stav (4) Zakona o Vladi Kantona Sarajevo („Službene novine Kantona Sarajevo“, broj: 36/14 - Novi prečišćeni tekst i 37/14 - Ispravka) Vlada Kantona Sarajevo, na **60.** sjednici održanoj **23.01.2025.** godine, donijela je

Z A K L J U Č A K

1. Utvrđuje se prijedlog Zakona o izmjeni i dopunama Zakona o koncesijama.
2. Prijedlog Zakona iz tačke 1. ovog zaključka dostavlja se Skupštini Kantona Sarajevo, na nadležno odlučivanje.
3. Ovaj zaključak stupa na snagu danom donošenja.

P R E M I J E R

Nihad Uk

Dostaviti:

1. Predsjedavajući Skupštine Kantona Sarajevo,
2. Skupština Kantona Sarajevo,
3. Zamjenici predsjedavajućeg Skupštine Kantona Sarajevo (3x),
4. Premijer Kantona Sarajevo,
5. Ministarstvo privrede Kantona Sarajevo,
6. Evidencija,
7. A r h i v a.



Bosna i Hercegovina
Federacija Bosne i Hercegovine
KANTON SARAJEVO
V L A D A

ZAKON
O IZMJENI I DOPUNAMA
ZAKONA O KONCESIJAMA
(Prijedlog)

Nosilac izrade:
Ministarstvo privrede

Sarajevo, novembar, 2024. godine

Na osnovu člana 13. stav (1) tačka i) i člana 18. stav (1) tačka b) Ustava Kantona Sarajevo ("Službene novine Kantona Sarajevo", br. 1/96, 2/96 - Ispravka, 3/96 - Ispravka, 16/97, 14/00, 4/01, 28/04, 6/13 i 31/17), Skupština Kantona Sarajevo, na ____ sjednici održanoj dana __. __. 2025. godine, donijela je

P r i j e d l o g

**ZAKON
O IZMJENI I DOPUNAMA
ZAKONA O KONCESIJAMA**

Član 1.

(Izmjena i dopuna člana 6.)

(1) U Zakonu o koncesijama ("Službene novine Kantona Sarajevo", br. 27/11, 15/13 i 1/22) u članu 6. iza stava (4) dodaje se novi stav (5) koji glasi:

"(5) Kanton, Grad Sarajevo, općina u Kantonu, javna ustanova i drugo pravno lice koje je budžetski korisnik i čiji je osnivač Kanton, Grad Sarajevo ili općina u Kantonu izuzeto je iz obaveze potpisivanja koncesionog ugovora za predmet koncesije iz člana 6. stav (1) tačka 4) ovog Zakona, pod uslovom da ima status prosumera ili prosumera koji djeluje zajednički ili vrši proizvodnju električne energije isključivo za vlastite potrebe bez isporuke u distributivnu mrežu u skladu sa važećim propisima."

(2) Dosadašnji st. (5) i (6) postaju st. (6) i (7).

Član 2.

(Dopuna člana 24.)

U članu 24. iza stava (7) dodaje se stav (8) koji glasi:

"(8) Resorno ministarstvo uz saglasnost Vlade Kantona donosi pravilnik o naknadama za koncesiju za predmete koncesije iz svog resora, u roku od tri mjeseca od dana stupanja na snagu ovog zakona. U postupku donošenja ovog pravilnika, resorno ministarstvo obavezno pribavlja i mišljenja jedinica lokalne samouprave."

Član 3.

(Stupanje na snagu)

Ovaj zakon stupa na snagu osmog dana od dana objavljivanja u "Službenim novinama Kantona Sarajevo".

Broj: _____/25
Sarajevo, __. __. 2025. godine

**PREDSJEDAVAJUĆI
SKUPŠTINE KANTONA SARAJEVO**

Elvedin Okerić

O B R A Z L O Ž E N J E

PRAVNI OSNOV

Pravni osnov za donošenje Zakona o izmjeni i dopunama Zakona o koncesijama ("Službene novine Kantona Sarajevo", br. 27/11, 15/13 i 1/22) sadržan je u članu 13. stav (1) tačka i) i članu 18. stav (1) tačka b) Ustava Kantona Sarajevo ("Službene novine Kantona Sarajevo", br. 1/96, 2/96 - Ispravka, 3/96 - Ispravka, 16/97, 14/00, 4/01, 28/04, 6/13 i 31/17).

RAZLOZI ZA DONOŠENJE

U okviru analize provođenja zakonskih obaveza koje su proistekle donošenjem Zakona o izmjenama i dopunama Zakona o koncesijama ("Službene novine Kantona Sarajevo", br. 27/11 i 15/13), koji je objavljen u "Službenim novinama Kantona Sarajevo", broj 1/22 i stupio na snagu 14.01.2022. godine, Ministarstvo privrede Kantona Sarajevo je, pored ostalog, konstatovalo - da su određeni subjekti iz člana 1. Prijedloga zakona o izmjeni i dopunama Zakona o koncesijama ("Službene novine Kantona Sarajevo", br. 27/11, 15/13 i 1/22) vršili izgradnju i/ili korištenje postrojenja za pretvaranje energije sunca u električnu energiju iako nisu bili oslobođeni od zakonske obaveze potpisivanja koncesionog ugovora, kao i da postoji trend da određeni ovi subjekti nastave sa izgradnjom i/ili korištenjem postrojenja za pretvaranje energije sunca u električnu energiju. S obzirom na navedeno, a imajući u vidu da ovi subjekti plaćanje električne energije vrše sredstvima iz budžeta Kantona Sarajevo, Grada Sarajevo ili općine u Kantonu Sarajevo i da se realizacijom ovih projekata ima za cilj postizanje ušteda u ovim budžetima, te u cilju promocije korištenja električne energije iz obnovljivih izvora energije - energije sunca ("zelene energije") ukazala se potreba za donošenjem Zakona o izmjeni i dopunama Zakona o koncesijama, kojim će se ovi subjekti izuzeti od obaveze potpisivanja koncesionog ugovora, a čime bi se u skladu sa svim važećim zakonskim popisima nastavila vršiti izgradnja i/ili korištenje ovih postrojenja od strane ovih subjekata, sa konačnim ciljem postizanja ušteda u odnosnim budžetima. Dalje, a u okviru analize provođenja Zakona o koncesijama ("Službene novine Kantona Sarajevo", br. 27/11, 15/13 i 1/22) po pitanju ugovaranja koncesionih naknada, Ministarstvo privrede Kantona Sarajevo je zaključilo - da se ovo pitanje treba detaljnije urediti, odnosno propisati, te je u tom smislu u Prijedlogu zakona o izmjeni i dopunama Zakona o koncesijama ("Službene novine Kantona Sarajevo", br. 27/11, 15/13 i 1/22) predložena dopuna člana 24. ovog Zakona, odnosno da se u istom doda nova zakonska odredba koja glasi: "Resorno ministarstvo uz saglasnost Vlade Kantona donosi pravilnik o naknadama za koncesiju za predmete koncesije iz svog resora, u roku od tri mjeseca od dana stupanja na snagu ovog zakona. U postupku donošenja ovog pravilnika, resorno ministarstvo obavezno pribavlja i mišljenja jedinica lokalne samouprave.".

S obzirom na navedeno, Ministarstvo privrede Kantona Sarajevo je ocijenilo neophodnim - da je potrebno, bez ikakvog daljeg odlaganja, donijeti Zakon o izmjeni i dopunama Zakona o koncesijama, odnosno donijeti ovaj zakon po hitnom postupku, a za što su ispunjeni uslovi. Slijedom toga, Ministarstvo privrede Kantona Sarajevo, kao nosilac pripreme ovog zakona, pripremilo je Prijedlog zakona o izmjeni i dopunama Zakona o koncesijama, u kojem su data potrebna pravna rješenja, a koja pravna rješenja su opisana u ovom obrazloženju.

U skladu sa Uredbom o postupku i načinu pripremanja, izrade i dostavljanja propisa ("Službene novine Kantona Sarajevo", broj 50/17 - Drugi novi prečišćeni tekst, 2/18 - Ispravka i 32/22) i Pravilnikom o proceduri za izradu izjave o fiskalnoj procjeni zakona, drugih propisa i akata planiranja na budžet ("Službene novine Federacije Bosne i Hercegovine", br. 34/16 i 15/18), Ministarstvo privrede Kantona Sarajevo je uputilo zahtjeve za dostavljanje mišljenja na Prijedlog zakona o izmjeni i dopunama Zakona o koncesijama, i to: Uredu za zakonodavstvo Vlade Kantona Sarajevo, Ministarstvu pravde i uprave Kantona Sarajevo, Ministarstvu finansija Kantona Sarajevo i Pravobranilaštvu Kantona Sarajevo. Po zahtjevima ovog Ministarstva, na

Prijedlog zakona o izmjeni i dopunama Zakona o koncesijama, dostavljena su mišljenja od strane: Ureda za zakonodavstvo Vlade Kantona Sarajevo, broj: 09-02-53602/24 od 06.01.2025. godine, Ministarstva pravde i uprave Kantona Sarajevo, broj: 03-04/2-02-53597/24 od 16.12.2024. godine, Ministarstva finansija Kantona Sarajevo, broj: 08/03-11-53604/24 NB od 17.12.2024. godine i Pravobranilaštva Kantona Sarajevo, broj: M-267/24 od 13.01.2025. godine. Nakon razmatranja gore navedenih mišljenja, Ministarstvo privrede Kantona Sarajevo je konstatovalo - **da su, u osnovi, sva gore pomenuta mišljenja pozitivna.**

PRAVNA RJEŠENJA

Član 1. - Ovim članom propisano je da se u Zakonu o koncesijama ("Službene novine Kantona Sarajevo", br. 27/11, 15/13 i 1/22) u članu 6. iza stava (4) dodaje novi stav (5) koji glasi: "(5) Kanton, Grad Sarajevo, općina u Kantonu, javna ustanova i drugo pravno lice koje je budžetski korisnik i čiji je osnivač Kanton, Grad Sarajevo ili općina u Kantonu izuzeto je iz obaveze potpisivanja koncesionog ugovora za predmet koncesije iz člana 6. stav (1) tačka 4) ovog Zakona, pod uslovom da ima status prosumera ili prosumera koji djeluje zajednički ili vrši proizvodnju električne energije isključivo za vlastite potrebe bez isporuke u distributivnu mrežu u skladu sa važećim propisima.", te je propisano da dosadašnji st. (5) i (6) postaju st. (6) i (7).

Član 2. - Ovim članom propisano je da se u Zakonu o koncesijama ("Službene novine Kantona Sarajevo", br. 27/11, 15/13 i 1/22) u članu 24. iza stava (7) dodaje stav (8) koji glasi: "(8) Resorno ministarstvo uz saglasnost Vlade Kantona donosi pravilnik o naknadama za koncesiju za predmete koncesije iz svog resora, u roku od tri mjeseca od dana stupanja na snagu ovog zakona. U postupku donošenja ovog pravilnika, resorno ministarstvo obavezno pribavlja i mišljenja jedinica lokalne samouprave."

Član 3. - Ovim članom propisano je stupanje na snagu ovog zakona.

FINANSIJSKA SREDSTVA

Provođenje ovog zakona ima uticaj na budžet Kantona Sarajevo i budžete općina u Kantonu Sarajevo, a isti je prikazan u Obrascu izjave o fiskalnoj procjeni - Obrazac IFP-DA. Za provođenje ovog zakona potrebna su budžetska sredstva u iznosu od 15.000,00 KM u 2025. godini, a u 2026. godini i 2027. godini nisu potrebna dodatna budžetska sredstva. Provođenjem ovog zakona, za projekciju izgradnje i korištenja solarnih elektrana instalisane snage 2000 kW/godina izvršena je procjena umanjjenja prihoda po osnovu naknada za koncesiju u 2025. godini (n), 2026. godini (n+1) i 2027. godini (n+2). Umanjenje prihoda dijeli se u omjeru: 40% u Budžet Kantona Sarajevo i 60% u Budžet općine u Kantonu Sarajevo na čijoj teritoriji se nalazi solarna elektrana. Od ukupnog umanjjenja prihoda, u Budžetu Kantona Sarajevo umanjjenje prihoda je sljedeće: u (n) godini u iznosu od 38.400,00 KM, (n+1) godini u iznosu od 46.992,40 KM i (n+2) godini u iznosu od 55.928,80 KM, a u Budžetu općina u Kantonu Sarajevo umanjjenje prihoda je sljedeće: u (n) godini u iznosu od 57.600,00 KM, (n+1) godini u iznosu od 70.488,60 KM i (n+2) godini u iznosu od 83.893,20 KM. Međutim, uzimajući u obzir da se investiciono ulaganje u izgradnju solarne elektrane, u investicionom ciklusu, umanjuje za visinu naknada za koncesiju u ovom ciklusu i za vrijednost električne energije proizvedene putem solarne elektrane u ovom ciklusu, konstatovano je - da je period povrata investicionih ulaganja u izgradnju solarne elektrane period od sedam godina.

Na osnovu navedenog, predlaže se Skupštini Kantona Sarajevo da, u skladu sa Poslovníkom Skupštine Kantona Sarajevo, pretrese Prijedlog zakona o izmjeni i dopunama Zakona o koncesijama i donese ovaj zakon po hitnom postupku.



Bosnia and Herzegovina
Federation of Bosnia and Herzegovina
CANTON SARAJEVO
Office for Legislature of Sarajevo Canton
Government

Broj: 09-02-53602/24
Sarajevo, 06.01.2025. godine

KANTON SARAJEVO
MINISTARSTVO PRIVREDE

PREDMET: Mišljenje na prijedlog Zakona o izmjeni i dopunama Zakona o koncesijama.-

Na osnovu člana 3. stav (1) tačka b) Uredbe o osnivanju Ureda za zakonodavstvo Vlade Kantona Sarajevo ("Službene novine Kantona Sarajevo", broj 20/23) i člana 4. Uredbe o postupku i načinu pripremanja, izrade i dostavljanja propisa ("Službene novine Kantona Sarajevo", broj 50/17- Drugi novi prečišćeni tekst, 2/18-Ispravka i 32/22), Ured za zakonodavstvo Vlade Kantona Sarajevo, daje slijedeće

MIŠLJENJE

1. Ured za zakonodavstvo Vlade Kantona Sarajevo nema primjedbi na dostavljeni tekst prijedloga Zakona o izmjeni i dopunama Zakona o koncesijama (u daljem tekstu: Zakon), a iz razloga koji su navedeni u obrazloženju predmetnog materijala, uz napomenu da odredbe člana 1. prijedloga Zakona sadrže isključivo stručna pitanja za čiju zakonitost odgovara nosilac pripreme predmetnog materijala.

2. Dostavljeni materijal je pripremljen u skladu sa Uredbom o postupku i načinu pripremanja, izrade i dostavljanja propisa ("Službene novine Kantona Sarajevo", broj: 50/17- Drugi novi prečišćeni tekst, 2/18- Ispravka i 32/22), te se isti može razmatrati na jednoj od narednih sjednica Vlade Kantona Sarajevo.

Dostaviti:

1. Naslovu
2. Evidencija
3. Arhiva



PO OVLAŠTENJU VLADE KANTONA SARAJEVO

Adis Bisić, dipl. pravnik



Bosnia and Herzegovina
Federation of Bosnia and Herzegovina
CANTON SARAJEVO
Ministry of Justice and Administration

Broj: 03-04/2-02-53597/24
Sarajevo, 16.12.2024. godine

MINISTARSTVO PRIVREDE
gosp. Zlatko Mijatović, ministar

PREDMET: Prijedlog Zakona o izmjenama i dopunama Zakona o koncesijama,
mišljenje -

VEZA: Vaš akt, broj: 07-04-02-53300-1/24 od 09.12.2024. godine

Postupajući po Vašem aktu, broj i datum gornji, na osnovu odredbi člana 7. Zakona o ministarstvima i drugim organima uprave Kantona Sarajevo ("Službene novine Kantona Sarajevo", broj 40/22) i člana 4. stav 6. Uredbe o postupku i načinu pripremanja, izrade i dostavljanja propisa ("Službene novine Kantona Sarajevo", br. 50/17 – Drugi novi prečišćeni tekst, 2/18 – Ispravka i 32/22), Ministarstvo pravde i uprave razmotrilo je dostavljeni prijedlog Zakona i daje sljedeće

MIŠLJENJE

Prijedlog Zakona o izmjenama i dopunama Zakona o koncesijama je propis kojim se ne povrjeđuju prava zaštićena odredbama Evropske konvencije o zaštiti ljudskih prava i osnovnih sloboda, niti je u suprotnosti sa drugim pravnim aktima, kojima je utvrđena zaštita ljudskih prava i sloboda.

S poštovanjem,

Dostaviti:

1. Naslovu;
2. a/a.



Adresa: Reisa Džemaludina Čauševića 1, 71 000 Sarajevo
Tel: + 387 (0) 33 562-083, Fax: + 387 (0) 33 562-241
Web: <http://mpu.ks.gov.ba>, E-mail: mpu@mpu.ks.gov.ba

1/1



Broj: 08/03-11-53604/24 NB
Sarajevo, 17.12.2024. godine

MINISTARSTVO PRIVREDE **KANTON SARAJEVO**

Predmet: Mišljenje na Prijedlog zakona o izmjenama i dopunama Zakona o koncesijama;
Veza: Vaš dopis, broj: 07-04-02-53300-2/24 od 09.12.2024 godine

Vezano za Vaš zahtjev za mišljenje na Prijedlog zakona o izmjenama i dopunama Zakona o koncesijama, u skladu sa članom 8. Pravilnika o proceduri za izradu izjave o fiskalnoj procjeni zakona, drugih propisa i akata planiranja na budžet („Službene novine Federacije BiH“, broj 34/16 i 15/18), dajemo sljedeće mišljenje:

Ministarstvo privrede Kantona Sarajevo je postupilo u skladu sa navedenim Pravilnikom i Ministarstvu finansija uz Prijedlog zakona dostavili na mišljenje popunjen i potpisan obrazac IFP-DA u kojem je data sljedeća izjava: „Za provođenje ovog Zakona potrebna su budžetska sredstva u iznosu od 15.000,00 KM u 2025. godini (n), a u 2026. godini (n+1) i 2027. godini (n+2) nisu potrebna dodatna budžetska sredstva. Provođenjem ovog Zakona, za projekciju izgradnje i korištenja solarnih elektrana instalisane snage 2000 kW/godina izvršena je procjena umanjenja prihoda po osnovu naknada za koncesiju u 2025. godini (n), 2026. godini (n+1) i 2027. godini (n+2). Umanjenje prihoda dijeli se u omjeru: 40% u Budžet Kantona Sarajevo i 60% u Budžet općine u Kantonu Sarajevo na čijoj teritoriji se nalazi solarna elektrana. Od ukupnog umanjenja prihoda, u Budžetu Kantona Sarajevo umanjenje prihoda je sljedeće: u (n) godini u iznosu od 38.400,00 KM, (n+1) godini u iznosu od 46.992,40 KM i (n+2) godini u iznosu od 55.928,80 KM, a u Budžetu općina u Kantonu Sarajevo umanjenje prihoda je sljedeće: u (n) godini u iznosu od 57.600,00 KM, (n+1) godini u iznosu od 70.488,60 KM i (n+2) godini u iznosu od 83.893,20 KM. Međutim, uzimajući u obzir da se investiciono ulaganje u izgradnju solarne elektrane, u investicionom ciklusu, umanjuje za visinu naknada za koncesiju u ovom ciklusu i za vrijednost električne energije proizvedene putem solarne elektrane u ovom ciklusu, konstatovano je - da je period povrata investicionog ulaganja u izgradnju solarne elektrane period od sedam godina, a nakon toga, u periodu od 23 godine, pored ostalog, ostvaruje se i značajan finansijski benefit za odnosne budžete, s obzirom da je rad solarne elektrane, u osnovi, automatiziran i da je vijek trajanja ove elektrane period od 25 do 30 godina.“

U obrascu izjave o fiskalnoj procjeni IFP-DA vidljivo je da će za implementaciju Prijedloga zakona o izmjenama i dopunama Zakona o koncesijama biti potrebna dodatna sredstva u iznosu 15.000,00 KM u 2025. godini, dok za 2026 i 2027. godinu neće biti potrebna dodatna sredstva.



Adresa: Maršala Tita 62, 71 000 Sarajevo
Tel: + 387 (0) 33 565-005, Fax: + 387 (0) 33 565-052
Web: <http://mf.ks.gov.ba> E-mail: mf@mf.ks.gov.ba

Također se u izjavi o fiskalnoj procjeni navodi da će usvajanjem Prijedloga zakona dovesti do umanjenja prihoda Kantona Sarajevo i to za 2025. godinu u iznosu od 38.400,00 KM, u 2026. godini 46.992,40 KM a za 2027. godinu u iznosu od 55.928,80 KM.

Na osnovu Izjave o fiskalnoj procjeni, a u skladu sa usvojenim Dokumentom okvirmog budžeta za 2025.-2027. godinu i usvojenim Nacrtom budžeta Kantona Sarajevo za 2025. godinu, Ministarstvo finansija konstatuje da nisu planirana naprijed navedena potrebna budžetska sredstva za 2025. godinu, te ukoliko se Vlada odluči za realizaciju Prijedloga zakona, potrebno je planirati nedostajuća sredstva u okviru fiskalnog kapaciteta Budžeta Kantona Sarajevo za 2025. godinu, pri tome uzimajući u obzir smanjenje prihodovne strane.

Ovo mišljenje je dato u skladu sa odredbama Prijedloga zakona koji se obrađuje i obrazloženja navedenog u Obrascu IFP-DA Izjave o fiskalnoj procjeni, čija tačnost je u isključivoj odgovornosti Predlagača, te ukoliko se naknadno utvrdi da navedene odredbe i podaci odstupaju od stvarno činjeničnog stanja, ovo mišljenje će se staviti van snage.



Dostaviti:

1. Naslovu
2. MF – Sektor za budžet i fiskalni sistem
3. a/a

Pripremio: Nedžad Bašić, dipl.ecc

Kontrolisala: Amina Moćević, mr. oec.



Adresa: Maršala Tita 62, 71 000 Sarajevo
Tel: + 387 (0) 33 565-005, Fax: + 387 (0) 33 565-052
Web: <http://mf.ks.gov.ba>, E-mail: mf@mf.ks.gov.ba

2/2

Bosna i Hercegovina
Federacija Bosne i Hercegovine
KANTON SARAJEVO
Pravobranilaštvo Kantona Sarajevo



Босна и Херцеговина
Федерација Босне и Херцеговине
КАНТОН САРАЈЕВО
Правобранилаштво Кантона Сарајево

Bosnia and Herzegovina
Federation of Bosnia and Herzegovina
CANTON SARAJEVO
Public Defender's Office of Sarajevo Canton

Broj: M-267/24
Sarajevo, 13.01.2025. godine

Bosna i Hercegovina
Federacija Bosne i Hercegovine
KANTON SARAJEVO
Ministarstvo privrede

Veza: Vaš akt, broj: 07-04-02-53300-3/24 od 09.12.2024. godine

Aktom, broj i datum veze, koji je zaprimljen u Pravobranilaštvu Kantona Sarajevo dana 12.12.2024. godine, obratili ste sa zahtjevom kojim tražite mišljenje ovog organa na Prijedlog Zakona o izmjenama i dopunama Zakona o koncesijama ("Službene novine Kantona Sarajevo" broj 27/11 15/13 i 1/22), a u skladu sa Uredbom o postupku i načinu pripremanja, izrade i dostavljanja propisa ("Službene novine Kantona Sarajevo", broj: 50/17 – Drugi prečišćeni tekst, 2/18 - Ispravka i 32/22).

Na osnovu uvida u prednje citirani Prijedlog Zakona, te nakon proučavanja važećih zakonskih propisa koji regulišu predmet Vašeg zahtjeva, Pravobranilaštvo Kantona Sarajevo na osnovu člana 15. Zakona o pravobranilaštvu izjašnjava se i daje sljedeće:

M I Š L J E N J E

Članom 3. stav 4. Uredbe o postupku i načinu pripremanja, izrade i dostavljanja propisa utvrđeno je da ukoliko se propisom regulišu imovinsko-pravni odnosi, nosilac izrade je dužan pribaviti mišljenje Pravobranilaštva Kantona Sarajevo shodno Zakonu o pravobranilaštvu, što je u konkretnom slučaju i učinjeno.

Polazeći od nadležnosti Pravobranilaštva, ovaj organ nema primjedbi na dostavljeni tekst Prijedloga Zakona o izmjenama i dopunama Zakona o koncesijama, s tim što ovom organu nije poznat finansijski efekat predmetnih izmjena po budžet kantona.

Za sve dodatne informacije ili konsultacije stojimo Vam na raspolaganju.

S poštovanjem,



<http://pb.ks.gov.ba>, e-mail: pb@pb.ks.gov.ba
Tel/fax: +387(0)33 214-033, +387(0)33 666-614 +387(0)33 226-024
Sarajevo, Branilaca Sarajeva 21



SLUŽBENE NOVINE KANTONA SARAJEVO

Godina XVI – Broj 27

Ponedjeljak, 24. oktobra 2011. godine
SARAJEVO

ISSN 1512-7052

KANTON SARAJEVO

Skupština Kantona

Na osnovu čl. 13. (i) i 18. (b) Ustava Kantona Sarajevo ("Službene novine Kantona Sarajevo", br. 1/96, 2/96, 3/96, 16/97, 14/00, 4/01 i 28/04) i člana 40. Zakona o koncesijama ("Službene novine Federacije BiH", br. 40/02 i 61/06) Skupština Kantona Sarajevo, na sjednici održanoj 24. oktobra 2011. godine, donijela je

ZAKON

O KONCESIJAMA

I - OPĆE ODREDBE

Član 1.

(Predmet Zakona)

Ovim Zakonom se definira pojam koncesije, osnovni pojmovi, predmet koncesije, utvrđuje planiranje i pripreme radnje za dodjelu koncesije, osnivanje i nadležnosti Komisije za koncesije, postupak dodjele koncesije, ugovor o koncesiji, prava i obaveze koncesionara, nadzor, te druga pitanja od značaja za ostvarivanje koncesija na području Kantona Sarajevo (u daljnjem tekstu: Kanton).

Član 2.

(Definiranje pojma koncesije)

Koncesija je davanje prava na korištenja prirodnog bogatstva, dobara u općoj upotrebi ili obavljanje djelatnosti od općeg interesa, koje nadležni kantonalni organ (u daljnjem tekstu: koncesor) dodjeljuje na određeno vrijeme, uz plaćanje koncesione naknade, domaćem ili stranom pravnom ili fizičkom licu registrovanom za obavljanje privredne djelatnosti (u daljnjem tekstu: koncesionar), pod uslovima propisanim ovim Zakonom.

Član 3.

(Cilj)

Cilj ovog zakona je da propiše transparentan, nediskriminatoran i jasan pravni okvir za utvrđivanje uslova pod kojima se pravnim ili fizičkim domaćim ili stranim licima registrovanim za obavljanje privredne djelatnosti, mogu dodjeljivati koncesije u Kantonu i stimulisanje ulaganja domaćeg i stranog kapitala u oblastima utvrđenim ovim Zakonom.

Član 4.

(Načela)

(1) Uredivanje uslova, načina i postupka dodjele koncesije zasniva se na načelima jednakog i pravičnog tretmana,

slobodne tržišne utakmice i autonomije volje ugovornih strana.

- (2) Načelo jednakog i pravičnog tretmana obuhvata zabranu diskriminacije po bilo kom osnovu između učesnika u postupku dodjele koncesije i izbora koncesionara, kao i obavezu da učesnici u postupku izbora koncesionara imaju potpune i tačne informacije o postupku, standardima i kriterijima za izbor koncesionara.
- (3) Načelo slobodne tržišne utakmice obuhvata zabranu ograničavanja konkurencije između učesnika i obavezu prihvatanja svih učesnika čije ponude zadovoljavaju uslove propisane zakonom.
- (4) Načelo autonomije volje obuhvata slobodu ugovornih strana da u skladu sa zakonom i drugim propisima i dobrim poslovnim običajima, međusobna prava i obaveze urede po svojoj volji.

Član 5.

(Osnovni pojmovi)

Pojmovi koji se koriste u ovom zakonu imaju slijedeća značenja:

- a) **Davalac koncesije (koncesor)** je Kanton Sarajevo - Vlada Kantona Sarajevo (u daljnjem tekstu: koncesor), koji putem resornih ministarstava vode postupak dodjele koncesije odnosno zaključuju ugovor o koncesiji.
- b) **Koncesija** je pravo obavljanja privrednih djelatnosti korištenjem prirodnih bogatstava, dobara u općoj upotrebi i obavljanje djelatnosti od općeg interesa određenih ovim zakonom.
- c) **Koncesionar** je pravno lice osnovano u skladu sa posebnim zakonima Federacije ili fizičko domaće ili strano lice kome se dodjeljuje koncesija i koje izvršava ugovor o koncesiji u skladu sa ovim zakonom.
- d) **Ugovor o koncesiji** je ugovor koji zaključuju koncesor s jedne strane i koncesionar s druge strane, a koji sadrži odredbe o međusobnim pravima i obavezama vezanim za korištenje dodijeljene koncesije.
- e) **Naknada za koncesiju** je naknada koju plaća koncesionar na osnovu ugovora o koncesiji.
- f) **Registar koncesija** je jedinstvena elektronska evidencija ugovora o koncesijama dodijeljenih na području Kantona.
- g) **Odluka o izboru najpovoljnijeg ponuđača** je upravni akt koji donosi koncesor na prijedlog Komisije za koncesije (u daljnjem tekstu: Komisija) nakon ocjene pristiglih ponuda

za dodjelu koncesije, a u skladu s dokumentacijom za nadmetanje i kriterijima za izbor najpovoljnije ponude.

- h) **Ponudač** je pravno ili fizičko domaće ili strano lice koje je dostavilo ponudu u postupku za dodjelu koncesije ili je podnijelo samoinicijativnu ponudu.

Član 6. (Predmet koncesije)

- (1) Predmeti koncesije prema odredbama ovog zakona su:
- 1) objekti saobraćaja u mirovanju (javne podzemne i/ili nadzemne garaže, parkirališta);
 - 2) izgradnja i/ili korištenje saobraćajnica u nadležnosti Kantona;
 - 3) izgradnja i/ili korištenje objekata u oblasti energetike i energetskih medija (hidroenergetski objekti, termoelektrane, termoeenergetski objekti, vjetroenergetski objekti, cjevovodi), instalirane snage do 5 MW;
 - 4) izgradnja i/ili korištenje objekata vodoprivrede i vodosnabdijevanja (hidroakumulacije, objekti snabdijevanja vodom, korištenje vodotoka i drugih voda);
 - 5) komunalne usluge (vodosnabdijevanje, zagrijavanje stanova, pogrebne usluge i dr.);
 - 6) kantonalni i općinski prevoz lica;
 - 7) sve vrste linijskog prevoza putnika na području Kantona;
 - 8) privredno, sportsko i turističko korištenje žičare;
 - 9) korištenje građevinskog zemljišta u oblasti niskogradnje;
 - 10) korištenje poljoprivrednog zemljišta;
 - 11) korištenje ljeikovitih, termalnih, mineralnih, termomineralnih voda i termomineralnih voda za zagrijavanje;
 - 12) hidromelioracioni sistemi i sistemi za vadenje materijala iz vodotoka i vodnih površina;
 - 13) istraživanje i/ili korištenje nemetalnih mineralnih sirovina uključujući sekundarne mineralne sirovine propisane posebnim zakonom;
 - 14) sve vrste energetskih i drugih mineralnih sirovina, uključujući sve vrste soli i solnih voda utvrđenih posebnim zakonom;
 - 15) odlaganje čvrstog otpada;
 - 16) reciklaža metalnih i nemetalnih otpadaka i ostataka;
 - 17) gospodarenje lovištima i privredni ribolov;
 - 18) hoteli i ostali turistički objekti;
 - 19) pojedine djelatnosti unutar zaštićenih područja prirode, te za korištenje drugih zaštićenih prirodnih vrijednosti i speleoloških objekata;
 - 20) prostori i objekti kulturno - historijskog i prirodnog naslijeđa;
 - 21) zdravstvene i farmaceutske usluge u skladu sa Zakonom o zdravstvenoj zaštiti i Zakonom o zdravstvenom osiguranju;
 - 22) sportsko rekreativni objekti;
 - 23) sve druge djelatnosti pogodne za dodjelu koncesije.

- (2) Javna preduzeća iz oblasti vodosnabdijevanja, čiji su osnivači Kanton ili općine u Kantonu Sarajevo izuzeta su iz obaveze potpisivanja koncesionog ugovora.

- (3) Vlada Kantona Sarajevo će posebnim propisom utvrditi način i kriterije definisanja javnog dobra kao i evidentiranja i otvaranja registra imovine koja ima karakter javnog dobra i odrediti organe za njeno provođenje.

II - PLANIRANJE I PRIPREMNE RADNJE ZA DODJELU KONCESIJE

Član 7. (Planski pristup)

- (1) Sva ministarstva Kantona dužna su izraditi srednjoročni (trogodišnji) i godišnji plan dodjele koncesije na način utvrđen ovim Zakonom.

- (2) Općine u Kantonu Sarajevo obavezne su predložiti projekte pogodne za dodjelu koncesije, koje resorno ministarstvo ukoliko ocijeni opravdanim može uključiti u planove iz stava (1) ovog člana.
- (3) U planove iz stava (1) ovog člana resorno ministarstvo može uključiti i prijedloge privrednih društava.
- (4) Koncesor, prije isteka tekuće kalendarske godine, utvrđuje listu projekata koji se u narednoj godini planiraju realizirati putem davanja koncesija, koja se objavljuje na njihovoj web-stranici.
- (5) U srednjoročnom planu dodjele koncesije navode se privredne i druge oblasti iz resora nadležnog ministarstva u kojima se planiraju dodijeliti koncesije za korištenje općeg ili drugog dobra, koncesije za javne radove i koncesije za javne usluge, te planirani prihodi i rashodi od koncesije, ocjena očekivane koristi od planiranih koncesija. Srednjoročni plan može sadržavati i druge elemente koji su od značaja za efikasnost provedbe koncesije.
- (6) Sva ministarstva Kantona dužna su prije isteka tekuće godine izraditi godišnji plan dodjele koncesija iz svoje nadležnosti za narednu kalendarsku godinu, kao sastavni dio njihovog godišnjeg programa rada. Ovaj godišnji plan mora biti u skladu sa srednjoročnim planom dodjele koncesija.
- (7) Godišnji plan dodjele koncesije sadrži:
- a) planirani broj koncesija,
 - b) vrstu svake koncesije,
 - c) rokove na koje se pojedine koncesije planiraju dodijeliti,
 - d) pravni osnov za dodjelu koncesije i
 - e) procijenjenu godišnju naknadu za pojedinu koncesiju.

Član 8. (Nadležnost za dodjelu koncesije)

Odluku o pristupanju dodjeli koncesije za određeno dobro donosi Skupština Kantona Sarajevo, na prijedlog Vlade Kantona Sarajevo (u daljnjem tekstu: Vlada Kantona), a na osnovu srednjoročnog (trogodišnjeg) i godišnjeg plana dodjele koncesija.

Član 9. (Pripremne radnje)

- (1) Pripremne radnje za dodjelu koncesije provodi Vlada Kantona.
- (2) Pripremnim radnjama smatraju se posebno:
- a) izrada studije opravdanosti dodjele koncesije,
 - b) procjena vrijednosti koncesije,
 - c) imenovanje Komisije,
 - d) izrada dokumentacije za nadmetanje, te
 - e) poduzimanje svih ostalih mjera koje prethode postupku dodjelu koncesije u skladu s odredbama ovog Zakona i posebnih propisa kojima se pobliže uređuje pojedina vrsta koncesije.

Član 10. (Studija opravdanosti dodjele koncesije)

Davalac koncesije (koncesor) u izradi studije opravdanosti dodjele koncesije istražuje javni interes, uticaj na okoliš, zaštitu prirode i kulturnih dobara, investicije, zapošljavanje, finansijske učinke čitavog koncesionog projekta, finansijske učinke u korist budućeg koncesionara, i uticaj koncesije na kantonalni budžet odnosno budžet jedinica lokalne samouprave i usklađenost sa privrednim razvojnim planovima i planovima koncesora.

Član 11. (Procjena vrijednosti koncesije)

- (1) Vrijednost koncesije obuhvata vrijednosni izraz finansijskih efekata u određenom ekonomskom vijeku korištenja koncesionog dobra, odnosno diskontiranih novčanih tokova u ekonomskom vijeku projekta.

SLUŽBENE NOVINE
KANTONA SARAJEVO

Ponedjeljak, 24. oktobra 2011.

Broj 27 – Strana 3

- (2) Elementi za izračunavanje vrijednosti koncesije utvrđuju se studijom opravdanosti dodjele koncesije.
- (3) Vrijednost koncesije se utvrđuje od strane Vlade Kantona, na prijedlog resornog ministarstva.

Član 12.

(Dokumentacija za nadmetanje)

- (1) Dokumentacija za nadmetanje sadrži oblik ponude, sadržaj ponude, rok valjanosti ponude, opis predmeta koncesije (tehničke specifikacije koje ne smiju ograničavati tržišno natjecanje), nacrt ugovora o koncesiji, uslove i dokaze koje su ponuđači obavezni dostaviti uz ponudu u svrhu dokazivanja sposobnosti ponuđača, rok za donošenje odluke o izboru najpovoljnijeg ponuđača, te sve ostale zahtjeve koje ponuđač mora ispuniti.
- (2) Koncesor je dužan utvrditi visinu garancije za ozbiljnost ponude u apsolutnom iznosu, a koja ne može iznositi više od 5% procijenjene vrijednosti koncesije.

Član 13.

(Osnivanje i sastav Komisije za koncesije)

- (1) Prije početka postupka dodjele koncesije, davalac koncesije je dužan u svakom pojedinačnom slučaju, imenovati Komisiju iz reda istaknutih stručnjaka iz područja prava, ekonomije, tehničkih i drugih odgovarajućih struka, zavisno o predmetu koncesije.
- (2) Komisija se sastoji od pet članova, uključujući predsjednika komisije.
- (3) Komisiju čine predstavnik resornog ministarstva, predstavnik jedinice/jedinica lokalne samouprave zavisno o tome gdje se nalazi predmet koncesije, predstavnik Ministarstva finansija Kantona Sarajevo, te dva člana iz reda istaknutih stručnjaka iz oblasti koja je predmet koncesije.
- (4) Na Komisiju se odnose odredbe Zakona o sukobu interesa u organima vlasti u Federaciji Bosne i Hercegovine ("Službene novine Federacije BiH", broj 70/08).
- (5) Komisija ima sekretara koji ne učestvuje u odlučivanju, a bira se iz reda državnih službenika resornog ministarstva čija je koncesija predmet dodjele.

Član 14.

(Nadležnosti Komisije)

- (1) Zadaci Komisije su:
 - a) priprema i izrada dokumentacije za nadmetanje, pravila i uslova za ocjenu ponuđača i primljenih ponuda, te kriterija za izbor ponude,
 - b) analiza projektnog prijedloga koncesije u cilju utvrđivanja da li se radi o projektu javno-privatnog partnerstva, kako je određen propisima kojima se uređuje javno-privatno partnerstvo,
 - c) pregled i ocjena pristiglih ponuda,
 - d) utvrđivanje prijedloga odluke o izboru najpovoljnijeg ponuđača za dodjelu koncesije ili prijedloga odluke o poništenju postupka dodjele koncesije uz obrazloženje tih prijedloga,
 - e) priprema prijedloga teksta ugovora o koncesiji,
 - f) obavljanje ostalih poslova potrebnih za provedbu postupka dodjele koncesije. Komisija o svom radu vodi zapisnik koji potpisuju svi članovi Komisije.
- (2) Za obavljanje određenih stručnih poslova koncesor može, po potrebi, angažirati stručna, savjetodavna, te specijalizovana tijela ili eksperte za ekonomsko -finansijsku, pravnu, ili tehničku oblast.

Član 15.

(Sredstva za rad Komisije)

- (1) Sredstva za rad i obavljanje poslova iz djelokruga Komisije osiguravaju se u budžetu nadležnih ministarstava.

- (2) Na prijedlog Ministarstva privrede Kantona Sarajevo (u daljnjem tekstu: Ministarstvo) jedinstvene kriterije za plaćanje komisija za dodjelu koncesija utvrđuje Vlada Kantona.

III - POSTUPAK DODJELE KONCESIJE

Član 16.

(Odobranje koncesionog projekta)

- (1) Resorno ministarstvo izrađuje prijedlog studije opravdanosti dodjele koncesije za svaki projekat koji je planom iz člana 7. stav (1) ovog zakona predviđen za dodjelu.
- (2) Uz prijedlog iz stava (1) ovog člana resorno ministarstvo je dužno koncesoru dostaviti i riješena prethodna pitanja, uključujući izvod iz prostornog planskog dokumenta i saglasnost općinskog vijeća.
- (3) Koncesor razmatra studiju iz stava (1) ovog člana.
- (4) Skupština Kantona Sarajevo donosi Odluku o pristupanju dodjeli koncesije na prijedlog koncesora, koji odobrava studiju iz stava (3) ovog člana.
- (5) Ukoliko ne odobri studiju iz stava (1) ovog člana, koncesor može dati prijedlog ili preporuke koje bi projekat učinile prihvatljivim.
- (6) Nakon odobravanja studije iz stava (4) ovog člana, Komisija priprema tekst javnog poziva koji će resorno ministarstvo objaviti u jednom od sredstava javnog informisanja. Ako koncesor ocijeni potrebnim, objavit će se i međunarodni javni poziv.
- (7) Postupak dodjele koncesije započinje danom objave Javnog poziva o namjeri davanja koncesije u "Službenim novinama Federacije BiH", koji se objavljuje i na web-stranici davaoca koncesije, a neizmijenjenog sadržaja može biti objavljen i u ostalim sredstvima javnog informisanja.
- (8) Postupak dodjele koncesije se završava konačnošću Odluke o izboru najpovoljnijeg ponuđača ili Odluke o poništavanju postupka dodjele koncesije.

Član 17.

(Javni poziv)

- (1) Javni poziv sadrži:
 - a) izvod iz prostornog planskog dokumenta;
 - b) opis projekta;
 - c) definiciju ekonomskih i pravnih uslova, te zahtjev koji se odnosi na projekt;
 - d) principe i metode izračunavanja naknade za koncesiju;
 - e) minimalni iznos naknade za koncesiju i naknade i takse za učešće na javnom pozivu;
 - f) opis sredstava i imovine koja se daje na raspolaganje koncesionaru;
 - g) kriterije za ocjenjivanje ponude i dodjeljivanje koncesije zasnovane na jasnim i javnim, svima dostupnim principima nediskriminacije;
 - h) rok za dostavljanje ponuda;
 - i) spisak potrebnih dozvola i odobrenja ili ovlaštenja;
 - j) poreske olakšice koje su vezane za projekat, ukoliko postoje;
 - k) mjere finansijskog obezbjeđenja ponude;
 - l) nacrt ugovora o koncesiji i
 - m) ukoliko su vršeni istražni radovi, vrijednost radova i jasnu naznaku da će u postupku dodjele koncesije Komisija vrednovati sredstva i napore uložene u istražne radove potencijalnom koncesionaru.
- (2) U slučaju da nije izrađena studija opravdanosti dodjele koncesije, Komisija može zahtijevati da javni poziv uključuje obavezu ponuđača da izradi tu studiju u sklopu koje će biti sadržane procjene i mjere zaštite čovjekove okoline.

- (3) Studija opravdanosti dodjele koncesije razmatra se pri procjeni kriterija na osnovu kojih se vrši dodjela koncesije.

Član 18.

(Kriteriji za izbor najpovoljnije ponude)

Kriteriji za izbor najpovoljnije ponude su:

- kriteriji za ekonomski najpovoljniju ponudu, koji su vezani za predmet koncesije su: kvalitet, visina naknade, cijena, tehničko dostignuće, estetske, funkcionalne i ekološke osobine, operativni troškovi, ekonomičnost, servisiranje nakon predaje i tehnička pomoć, datum i rokovi isporuke ili rokovi završetka radova;
- najviša ponudena naknada za koncesiju;
- kriteriji određeni posebnim propisima, koji ukazuju na dugoročnu održivost ponuđača za vrijeme provedbe koncesije u predviđenom roku.

Član 19.

(Odluka o izboru najpovoljnijeg ponuđača)

- Koncesor donosi odluke u skladu sa odredbama Zakona o upravnom postupku.
- Koncesor, na prijedlog Komisije, donosi odluku o izboru najpovoljnijeg ponuđača, ako su ispunjeni svi uslovi i kriteriji utvrđeni u javnom pozivu.
- Koncesor, na prijedlog Komisije, može donijeti odluku iz stava (2) ovog člana i u slučaju ako je na javni poziv pristigla samo jedna ponuda.
- Odluka iz stava (1) ovog člana dostavlja se svim učesnicima javnog poziva.
- Odluka o izboru najpovoljnijeg ponuđača obavezno sadrži:
 - naziv koncesora s brojem i datumom donošenja odluke,
 - ministarstvo koje će u ime koncesora zaključiti ugovor,
 - naziv koncesionara,
 - predmet koncesije,
 - prirodu, obim i mjesto obavljanja djelatnosti koncesije,
 - rok na koji će se zaključiti ugovor o koncesiji,
 - posebne uslove kojima tokom trajanja koncesije mora udovoljavati ponuđač,
 - iznos naknade za koncesiju ili osnovu za utvrđivanje iznosa naknade za koncesiju koju će koncesionar plaćati,
 - rok u kojem je najpovoljniji ponuđač obavezan potpisati ugovor o koncesiji s koncesorom,
 - obrazloženje razloga za izbor ponuđača,
 - pouku o pravnom lijeku.
- Protiv Odluke koncesora iz stava (1) ovog člana nije dozvoljena žalba, ali se može pokrenuti upravni spor pred Kantonalnim sudom u Sarajevu.

Član 20.

(Samoinicijativna ponuda)

- U slučaju da ponuđač resomom ministarstvu podnese zahtjev za dodjelu koncesije za koju nije raspisan javni poziv, a nije obuhvaćena planskim dokumentima iz člana 7. ovog zakona, Vlada Kantona formira Komisiju iz člana 13. ovog zakona, koja procjenjuje da li postoji javni interes i putem resomog ministarstva dostavlja prijedlog odluke Vladi Kantona.
- Uz zahtjev iz stava (1) ovog člana obavezno se dostavlja studija opravdanosti dodjele koncesije i riješena prethodna pitanja (izvod iz prostornog planskog dokumenta, saglasnost općinskog vijeća, kao i dokumenti koji su specifični za oblast koncesije).
- Kod ocjene zahtjeva iz stava (1) ovog člana uzima se u obzir naročito:
 - da projekat koji je predmet predložene koncesije može biti ostvaren samo u slučaju ako se koristi proces, projektovanje, metodologija ili koncept istraživanja na koje ponuđač polaže isključiva prava i

- hitnost pružanja usluga ili postojanje infrastrukture za javnu upotrebu.

- Ministarstvo podnosi zahtjev Vladi Kantona za dobijanje ovlaštenja za pregovore sa ponuđačem, ukoliko Vlada Kantona ocijeni da postoji javni interes za koncesiju.
- Vlada Kantona u roku od 30 (trideset) dana obavještava Ministarstvo da li odobrava davanje ovlaštenja.
- U ovlaštenju koje Vlada Kantona daje, sadržana je obaveza praćenja procesa ili izvršenja uvida u dokumentaciju.
- Ministarstvo ne može zaključiti ugovor o koncesiji na osnovu samoinicijativne ponude, ukoliko ne dobije ovlaštenje od Vlade Kantona.
- Vlada Kantona može odbiti davanje ovlaštenja za pregovore u slučaju kada samoinicijativna ponuda nije predviđena članom 7. ovog zakona (planski pristup), ali ako ocijeni njenu opravdanost postupak dodjele koncesije se sprovodi u skladu sa procedurom propisanom ovim zakonom.
- Ukoliko Vlada Kantona ocijeni da ne postoji javni interes za dodjelu koncesije, o tome će Odlukom o odbijanju zahtjeva obavijestiti podnosioca samoinicijativne ponude u roku od 60 (šezdeset) dana od dana prijema zahtjeva. Odluka o tome da ne postoji javni interes mora biti obrazložena.
- Protiv Odluke iz stava (9) ovog člana nije dozvoljena žalba, ali se može pokrenuti upravni spor pred Kantonalnim sudom u Sarajevu.

IV - UGOVOR O KONCESIJI

Član 21.

(Sadržaj ugovora o koncesiji)

- Ugovor o koncesiji obavezno sadrži:
 - ugovorne strane,
 - predmet koncesije,
 - visinu koncesione naknade,
 - mjere finansijskog obezbjeđenja ugovora,
 - prava i obaveze ugovornih strana, uključujući i obaveze pružanja sigurne usluge korisnicima po najnižim cijenama,
 - obaveze koncesionara u oblasti zaštite okoliša,
 - obavezu revitalizacije obnovljivog prirodnog bogatstva, odnosno rekultivaciju neobnovljivog prirodnog bogatstva,
 - obavezu upisa u zemljišne knjige Ugovora o koncesiji,
 - radnje vezane za dobijanje potrebnih ovlaštenja za provođenje aktivnosti u skladu sa ugovorom o koncesiji,
 - uslove investiranja,
 - sredstva i imovinu koju na raspolaganje daje koncesor,
 - olakšice u korištenju zemljišta,
 - uslove, način i vrijeme korištenja predmeta koncesije,
 - uslove za obnavljanje ugovora,
 - postupanje koncesionara sa predmetima nadenim u toku korištenja predmeta koncesije, a koji predstavljaju vrijednost prirodnog, historijskog, kulturnog i/ili graditeljskog naslijeđa Bosne i Hercegovine,
 - postupanje koncesionara u slučaju kada bi daljnje korištenje predmeta koncesije ugrožavalo nalazište, odnosno vrijednost i cjelinu predmeta koji predstavljaju vrijednost prirodnog, historijskog, ili historijsko - kulturnog i/ili graditeljskog naslijeđa Bosne i Hercegovine,
 - mjere za omogućavanje finansiranja projekta,
 - opis događaja koji se smatraju višom silom,
 - određivanje i usklađivanje tarifa,
 - sankcije i naknade za neispunjavanje obaveza ugovornih strana,
 - postupak u slučaju nemogućnosti ispunjavanja ugovora, za koji ne odgovara nijedna strana,
 - raskid ugovora i postupak u slučaju raskida ugovora prije datuma prestanka utvrđenog ugovorom,

- 23) način rješavanja sporova, uključujući i međunarodnu arbitražu, ako se ugovorne strane o tome dogovore,
- 24) ugovorenu nadležnost suda i
- 25) ostale elemente bitne za predmet koncesije.
- (2) Ugovorom o koncesiji određuju se prava i obaveze davaoca koncesije i koncesionara u skladu s odredbama ovog Zakona, te posebnih propisa kojima se uređuje određena koncesija.
- (3) Na pitanja iz ugovora o koncesiji koja nisu uređena ovim Zakonom primjenjuju se odredbe propisa kojima se uređuju obligacioni odnosi.
- (4) U slučaju koncesije koja je sastavni dio projekta javno-privatnog partnerstva odgovarajuće se primjenjuje i propis kojim se uređuje sadržaj ugovora o javno-privatnom partnerstvu.
- (4) Visina naknade za koncesiju određuje se zavisno o vrsti djelatnosti, roku trajanja koncesije, poslovnom riziku i očekivanoj dobiti, opremljenosti i površini općeg odnosno javnog dobra.
- (5) Ugovorom o koncesiji obavezno se određuje promjena visine naknade za koncesiju u određenom vremenskom razdoblju za vrijeme trajanja ugovora o koncesiji, što se naznačava u dokumentaciji za nadmetanje.
- (6) Naknade za koncesije su prihod kantonalnog budžeta i budžeta jedinice lokalne samouprave, koji se raspoređuju u iznosu od 60% u budžet Kantona, a iznos od 40% u budžet općine na čijoj teritoriji se nalazi predmet koncesije.
- (7) Za vrijeme trajanja ugovora o koncesiji koncesor ne može propisivati niti ugovarati s koncesionarom bilo koji oblik kompenzacije u zamjenu za plaćanje naknade za koncesiju.

Član 22.
(Rok na koji se daje koncesija)

- (1) Ugovor o koncesiji zaključuje se na određeno vrijeme s tim da to razdoblje ne može biti kraće od pet niti duže od trideset godina. Ugovor o koncesiji može se obnoviti za period koji ne može biti duži od polovine prvobitno ugovorenog roka pod uslovima potpunog ispunjenja koncesionog ugovora i na osnovu studije opravdanosti dodjele koncesije.
- (2) Trajanje koncesije će se odrediti na način koji ne ograničava tržišno nadmetanje više nego što je to nužno kako bi se osigurala amortizacija ulaganja koncesionara i razuman povrat uloženog kapitala, istovremeno uzimajući u obzir rizik koji je povezan s privrednim korištenjem koncesije.

Član 23.
(Prenos koncesionog ugovora)

- (1) Ugovor o koncesiji ne može se prenijeti na drugog koncesionara bez prethodne saglasnosti Skupštine Kantona Sarajevo. Ugovor o koncesiji se može prenijeti samo ukoliko su ispunjeni uslovi iz ugovora koji se odnose na investiranje.
- (2) U slučaju da koncesionar nije ispunio preuzetu obavezu prema međunarodnoj finansijskoj instituciji čiji je član Bosna i Hercegovina, ugovor o koncesiji ne može se prenijeti na odnosnu instituciju bez saglasnosti koncesora.
- (3) Prilikom razmatranja zahtjeva za dobijanje saglasnosti iz stava (1) ovog člana, koncesor uzima u obzir:
- a) finansijsko stanje predloženog novog koncesionara;
 - b) stručnost i sposobnost predloženog novog koncesionara da pruža usluge i izvršava svoje obaveze iz ugovora o koncesiji i
 - c) uticaj koji će data koncesija imati na koncentraciju vlasništva u određenom sektoru djelatnosti.
- (4) Novi koncesionar preuzima prava i obaveze prethodnog koncesionara.

Član 24.
(Naknada za koncesiju)

- (1) Naknada za koncesiju je obavezan i sastavni element ugovora o koncesiji, a ugovor bez utvrdene obaveze plaćanja koncesione naknade je ništav.
- (2) Naknada za koncesiju mora biti novčanog karaktera, a sastoji se: iz naknade za pravo koje se obračunava jednokratno, kod zaključivanja ugovora o koncesiji i koncesione naknade za korištenje, koje se izražava u procentima i odnosi se na godišnji bruto prihod nastao korištenjem javnih dobara, prirodnih bogatstava ili pružanja usluga ili po jedinici mjere - tona, m³, m² i
- (3) Naknada za koncesiju može biti ugovorena kao stalan jednak iznos i/ili kao varijabilni iznos, zavisno o posebnostima pojedine vrste koncesije.

Član 25.
(Prestanak ugovora)

Ugovor o koncesiji prestaje:

- a) istekom ugovorenog roka u skladu sa ovim zakonom,
- b) otvaranjem stečajnog postupka nad koncesionarom,
- c) prestankom postojanja predmeta koncesije,
- d) raskidom ugovora o koncesiji i
- e) ako koncesionar ne ispunjava ciljeve i efekte date koncesije.

Član 26.
(Raskid ugovora)

- (1) Ugovor o koncesiji može se raskinuti:
- a) ako je koncesionar nesolventan duže od šest mjeseci,
 - b) ako koncesionar ili koncesor ne ispunjavaju ugovorene obaveze i
 - c) ako obavlja djelatnost na način suprotan odredbama koncesionog ugovora.

Član 27.
(Nemogućnost ispunjavanja ugovora za koju ne odgovara nijedna strana - Prekid ugovora)

- (1) Kad je ispunjenje obaveze jedne strane postalo nemoguće zbog događaja za koje nije odgovorna ni jedna strana, a nijedna ugovorna strana ne želi raskid ugovora, koncesioni odnos se nastavlja kad prestanu okolnosti koje su dovele do nemogućnosti obavljanja djelatnosti, odnosno neispunjavanja ugovornih obaveza. Te okolnosti su:
- a) ako se vršenjem koncesione djelatnosti ugrožava životna sredina i zdravlje ili zakonom zaštićena područja i objekti, što se u vremenu davanja koncesije nije moglo predvidjeti,
 - b) u slučaju nemogućnosti obavljanja djelatnosti zbog znatnijeg oštećenja objekta koncesije koje nije skrivio ili koje nije posljedica grube nepažnje koncesionara i
 - c) u drugim slučajevima predviđenim ugovorom o koncesiji.
- (2) Za vrijeme proteklo u nemogućnosti ispunjenja ugovora produžava se rok na koji je potpisan koncesioni ugovor.

Član 28.
(Registar koncesija)

- (1) Registar koncesija jedinstvena je elektronska evidencija koncesija dodijeljenih na području Kantona koji se formira na osnovu registara koncesija resornih ministarstava.
- (2) Jedinstveni registar svih zaključenih ugovora o koncesiji vodi Ministarstvo finansija Kantona Sarajevo.
- (3) Registrom koncesija garantuje se dostupnost javnosti podataka. Javnim podacima smatraju se: naziv davaoca koncesije, matični broj davaoca koncesije, datum početka ostvarivanja koncesije, naziv (vrsta) koncesije i lokacija koncesije.
- (4) U registar koncesija evidentiraju se ugovori i o ranije zaključenim koncesijama kojima do dana stupanja na snagu ovog zakona nije istekao rok trajanja koncesije, te svi

ugovori koji će se zaključiti nakon stupanja na snagu ovog Zakona.

- (5) Ministarstvo finansija Kantona Sarajevo donosi Pravilnik o formiranju i vođenju registra koncesija u roku od 6 mjeseci od dana stupanja na snagu ovog zakona u kome može utvrditi da poslove uspostave i vođenja jedinstvenog registra koncesija povjerava organizaciji koja je informatički i kadrovski osposobljena za vođenje istog.

V - KONCESIONAR

Član 29.

(Pravni status koncesionara)

Koncesionar je pravno ili fizičko domaće ili strano lice registrovano za obavljanje privredne djelatnosti sa kojim koncesor zaključuje ugovor o koncesiji i koji ima prava i obaveze utvrđene ugovorom u skladu sa ovim Zakonom.

Član 30.

(Prava koncesionara)

Koncesionar ima pravo posjedovanja i korištenja sredstava i imovine koje mu koncesor stavlja na raspolaganje, u skladu sa ugovorom o koncesiji.

Član 31.

(Obaveze koncesionara)

Koncesionar je dužan obavljati djelatnost koja je utvrđena kao predmet koncesije u ugovoru o koncesiji i ne može je proširiti mimo obima utvrđenog ugovorom o koncesiji.

VI - NADZOR

Član 32.

(Nadzor nad provođenjem zakona i ugovora)

- (1) Resorno ministarstvo je obavezno kontinuirano nadzirati rad koncesionara i izvršavanje njegovih obaveza iz ugovora o koncesiji, te redovno pratiti obim i količinu korištenja koncesionog prava.
- (2) U slučaju odstupanja od ugovorenog korištenja koncesionog prava u vremenu i količini, resorno ministarstvo informiše koncesora i Ministarstvo finansija i poduzima mjere kod nadležne inspekcije u roku od 30 dana od dana saznanja o odstupanju.
- (3) Ministarstvo finansija je u okviru svoje nadležnosti obavezno pratiti izvršavanje svih uplata, a u slučaju neispunjenja ugovorenih obaveza poduzimati sve mjere naplate istih kod nadležnih organa, o čemu obavještava koncesora.
- (4) U postupcima kada nije moguće ispunjenje obaveza iz ugovora o koncesiji ili usljed drugih uočenih nepravilnosti, koncesor je dužan o tome obavijestiti nadležno Pravobranilaštvo i ostale nadzorne inspeksijske službe, te pokrenuti sve nužne mjere radi otklanjanja uočenih nepravilnosti, o čemu je obavezno obavijestiti Ministarstvo finansija u roku od 30 dana od dana poduzimanja mjera.

Član 33.

(Rješavanje sporova)

- (1) Za rješavanje sporova u pogledu ispunjavanja ugovorom preuzetih obaveza od strane koncesora i koncesionara nadležan je Općinski sud u Sarajevu.
- (2) Sporove koji nastanu u vezi nadležnosti za dodjelu koncesije između Federacije BiH i Kantona rješava Specijalna zajednička komisija za koncesije utvrđena Zakonom o koncesijama ("Službene novine Federacije BiH", br. 40/02 i 61/06).
- (3) Za sporove koji nastanu u vezi nadležnosti za dodjelu koncesija između kantona zatražit će se arbitraža komisije iz stava (2) ovog člana.

- (4) Za sporove koji nastanu u vezi nadležnosti za dodjelu koncesija, a kada se određeno dobro nalazi na području dvije ili više općina Kantona, Vlada Kantona će formirati Zajedničku komisiju čiji su članovi predstavnici Kantona i općina na čijem se području nalazi predmet koncesije.

- (5) Za sporove koji nastanu u vezi nadležnosti za dodjelu koncesije, a koji se ne mogu riješiti, pokrenut će se upravni spor kod Kantonalnog suda u Sarajevu.

VII - KAZNE NE ODREDBE

Član 34.

(Kaznene odredbe)

- (1) Novčanom kaznom u iznosu od 5.000,00 KM do 15.000,00 KM, kaznit će se za prekršaj pravno lice koje koristi prirodno bogatstvo, dobro u općoj upotrebi, bez potpisanog ugovora o koncesiji.
- (2) Novčanom kaznom u iznosu od 1.500,00 KM do 3.000,00 KM kaznit će se za prekršaj odgovorno lice u pravnom licu za radnje iz stava (1) ovog člana.
- (3) Novčanom kaznom u iznosu od 500,00 KM do 1.500,00 KM, kaznit će se za prekršaj fizičko lice koje koristi prirodno bogatstvo, dobro u općoj upotrebi bez potpisanog ugovora o koncesiji.
- (4) Novčanom kaznom u iznosu od 3.000,00 KM do 10.000,00 KM, kaznit će se za prekršaj pravno lice - koncesionar ukoliko koristi predmet koncesije u obimu većem od ugovorenog.
- (5) Novčanom kaznom u iznosu od 1.500,00 KM do 3.000,00 KM kaznit će se za prekršaj odgovorno lice u pravnom licu koncesionara za radnje iz stava (4) ovog člana.
- (6) Novčanom kaznom u iznosu od 500,00 KM do 1.000,00 KM, kaznit će se za prekršaj fizičko lice - koncesionar ukoliko koristi predmet koncesije u obimu većem od ugovorenog.
- (7) Novčanom kaznom u iznosu od 2.000,00 KM do 12.000,00 KM, kaznit će se za prekršaj pravno lice - koncesionar koji je dao lažne izjave radi osiguranja transfera udjela, dionica ili uvjerenja o dionicama, a na osnovu kojih koncesor izdaje ovlaštenje za transfer.
- (8) Novčanom kaznom u iznosu od 500,00 KM do 3.000,00 KM kaznit će se za prekršaj odgovorno lice u pravnom licu - koncesionara za radnje iz stava (7) ovog člana.
- (9) Novčanom kaznom od 1.000,00 KM do 3.000,00 KM kaznit će se za prekršaj lica iz st. (7) i (8) ovog člana ako:
 - a) propuste ili odbiju da popune i vrate nepopunjena dokumenta na način propisan ovim zakonom;
 - b) propuste ili odbiju da odgovore na pitanja koja se postavljaju u dokumentima;
 - c) namjerno daju pogrešan odgovor;
 - d) propuste da odgovore na pitanja kojima se mogu utvrditi činjenice za koje se vrši upit;
 - e) na zahtjev koncesora odbiju da predoče osobi ovlaštenoj od strane resornog ministra da provjeri knjigu, dokumente, račune, arhive ili drugu dokumentaciju;
 - f) propuste ili odbiju da obave neku dužnost koja im se povjeri, a za koju nije utvrđena kazna;
 - g) propuste ili odbiju da izvrše zahtjev ili nalog koji izda koncesor, ili presudu nadležnog suda; ili
 - h) propuste da izvrše obavezu upisa u zemljišne knjige ugovora o koncesiji (član 21. stav (1) tačka 8).
- (10) U smislu stava (8) ovog člana radnja, propust ili greška bilo kojeg odgovornog lica, službenika, agenta, ili drugog lica koje djeluje u ime ili je zaposlen kod nekog koncesionara i djeluje u okviru svoga posla i uputa, u svakom slučaju smatra se činom, propustom ili greškom toga koncesionara.

VIII - PRELAZNE I ZAVRŠNE ODREDBE

Član 35.

(Potpisivanje ugovora sa postojećim korisnicima)

- 1) Privredno društvo koje je nosilac prava za korištenje općeg ili drugog dobra zaključuje ugovor o koncesiji bez provođenja postupka propisanog ovim Zakonom na period od pet (5) godina, ako nosilac prava korištenja ispunjava uslove za dodjelu koncesije propisane ovim Zakonom.
- 2) Korisnik općeg ili drugog dobra iz stava (1) ovog člana dužan je podnijeti zahtjev za potpisivanje ugovora o koncesiji u roku od 30 (trideset) dana od dana stupanja na snagu ovog Zakona.
- 3) Koncesor je dužan u roku od 90 (devedeset) dana riješiti postupak po zahtjevu koncesionara iz stava (2) ovog člana.
- 4) Ako privredno društvo ne postupi u skladu sa stavom (2) ovog člana, koncesija se dodjeljuje po postupku propisanom ovim zakonom.
- 5) Rok iz stava (2) ovog člana računa se od dana stupanja na snagu ovog zakona.
- 6) Ako ugovor iz stava (1) ovog člana ne bude zaključen u propisanom roku nadležni inspekcijski organ rješenjem će zabraniti korištenje koncesije.
- 7) Na koncesionare koji su potpisali koncesione ugovore za predmete koncesije koji su u nadležnosti Kantona po važećim propisima na period do 5 (pet) godina, ne primjenjuju se odredbe člana 22. stav (1) ovog zakona, nego imaju pravo kroz provođenje procedure utvrđene ovim Zakonom za isti predmet koncesije potpisati novi koncesioni ugovor.

Član 36.

(Obaveze javnih preduzeća)

Obavezi potpisivanja koncesionog ugovora, u skladu sa članom 35. ovog Zakona, podliježu i javna preduzeća, izuzev javnih preduzeća iz člana 6. stav (2) ovog zakona.

Član 37.

(Prestanak važenja Zakona)

Danom stupanja na snagu ovog Zakona prestaje da važi Zakon o koncesijama ("Službene novine Kantona Sarajevo", broj 21/03).

Član 38.

(Stupanje na snagu Zakona)

Ovaj zakon stupa na snagu osmog dana od dana objavljivanja u "Službenim novinama Kantona Sarajevo".

Broj 01-02-27838/11
24. oktobra 2011. godine
Sarajevo

Predsjedavajuća
Skupštine Kantona Sarajevo
Prof. dr. Mirjana Malić, s. r.

Na osnovu čl. 11.-14. i člana 18. tačka b) Ustava Kantona Sarajevo ("Službene novine Kantona Sarajevo", br. 1/96, 2/96, 3/96, 16/97, 14/00, 4/01 i 28/04), Skupština Kantona Sarajevo, na sjednici održanoj 24. oktobra 2011. godine, donijela je

ZAKON

O JAVNO - PRIVATNOM PARTNERSTVU

POGLAVLJE I - OPĆE ODREDBE

Član 1.

(Predmet Zakona)

Ovim Zakonom se određuje pojam i predmet javno-privatnog partnerstva, definira javno tijelo, javni i privatni partneri i drugi osnovni pojmovi, utvrđuje cilj i načela, uređuju modeli javno-privatnog partnerstva u Kantonu Sarajevo (u daljnjem tekstu: Kanton), planiranje i pripremanje, postupak predlaganja, odobravanja i provedbe projekata javno-privatnog partnerstva u oblastima koje su u nadležnosti Kantona, Grada Sarajeva i općina na području Kantona, prava i obaveze javnih i privatnih partnera,

osnivanje i nadležnosti Komisije za javno-privatno partnerstvo (u daljnjem tekstu: Komisija), pravna zaštita, te druga pitanja od značaja za javno-privatno partnerstvo.

Član 2.

(Definiranje pojma i predmeta javno-privatnog partnerstva)

- (1) Javno-privatno partnerstvo (u daljnjem tekstu: JPP), u smislu ovog Zakona je dugoročan partnerski odnos između javnog i privatnog partnera koji podrazumijeva oblik zadovoljavanja određenih javnih potreba putem projekata JPP-a.
- (2) Predmet JPP-a je izgradnja, rekonstrukcija, upravljanje i održavanje kapaciteta za zadovoljavanje javnih potreba u svim oblastima javnog partnera.
- (3) Predmet JPP-a ne može biti isključivo isporuka robe, kao niti isključivo koncesija za privredno korištenje općeg ili drugog dobra.
- (4) Osnovna obilježja JPP-a su sljedeća:

a) privatni partner od javnog partnera preuzima:

- 1) obavezu projektovanja, gradnje i/ili rekonstrukcije javne infrastrukture i/ili građevine od javnog interesa, uključujući gradnju i/ili rekonstrukciju javnih informacijsko-komunikacijskih sistema, preuzimajući pri tome i jednu ili više obaveza kao što su finansiranje, upravljanje i održavanje, a u svrhu pružanja krajnjim korisnicima javne usluge iz okvira nadležnosti javnog partnera, ili u svrhu osiguravanja javnom partneru potrebnih preduoslova za pružanje javnih usluga iz okvira njegovih nadležnosti, ili
- 2) pružanje krajnjim korisnicima javnih usluga iz okvira nadležnosti javnog partnera, uključujući pružanje usluga upravljanja informacijsko-komunikacijskim sistemima od javnog interesa, odnosno pružanja javnih usluga krajnjim korisnicima na izgrađenim informacijsko-komunikacijskim sistemima.

b) u zamjenu za preuzete obaveze, javni partner može na privatnog partnera prenijeti određena stvarna prava i/ili privatnom partneru dodijeliti ili prenijeti koncesiju, u skladu sa Zakonom o koncesijama i/ili privatnom partneru plaćati naknadu u novcu,

c) svaki od partnera preuzima odgovornost za rizik na koji može uticati, ili je odgovornost podijeljena, a s ciljem optimalnog upravljanja rizikom tokom trajanja projekta JPP-a, uz ostalo i korištenjem upravljačkih, tehničkih, finansijskih i inovacijskih sposobnosti privatnog partnera, kao i razmjenom umijeća i znanja između javnog i privatnog partnera.

Član 3.

(Cilj)

Cilj ovog Zakona je da omogući transparentan, nediskriminatoran i jasan pravni okvir u zakonom određenom postupku utvrđivanja uslova pod kojima domaća i strana privatna pravna lica mogu realizirati projekte JPP-a sa javnim partnerima u Kantonu.

Član 4.

(Načela)

U provedbi ovog Zakona, javni partner dužan je poštovati sljedeća načela: načelo zaštite javnog interesa, načelo tržišnog nadmetanja, načelo efikasnosti, načelo jednakog tretmana, načelo uzajamnog priznavanja, načelo srazmjernosti, načelo transparentnosti, načelo slobode ugovaranja, načelo zaštite okoliša.

Član 5.

(Osnovni pojmovi)

Pojedini pojmovi u smislu ovoga Zakona imaju sljedeća značenja:

- a) **Projekat** čini niz međusobno povezanih aktivnosti koje se odvijaju utvrđenim redoslijedom radi postizanja jasnih

Sarajevo, na sjednici održanoj dana 04.04.2013. godine, donijela je

ZAKON

O IZMJENAMA ZAKONA O KONCESIJAMA

Član 1.

U Zakonu o koncesijama ("Službene novine Kantona Sarajevo", broj 27/11) u članu 6. stav (1) brišu se tač. 1), 9) i 20).

Član 2.

U članu 24. stav (6) mijenja se i glasi:

"(6) Naknade za koncesije su prihod kantonalnog budžeta i budžeta jedinica lokalne samouprave, koje se raspoređuju u iznosu od 40% u budžet Kantona, a iznos od 60% u budžet općine na čijoj teritoriji se nalazi predmet koncesije".

Član 3.

Ovaj zakon stupa na snagu osmog dana od dana objavljivanja u "Službenim novinama Kantona Sarajevo".

Broj 01-02-7993/13
04. aprila 2013. godine
Sarajevo

Predsjedavajuća
Skupštine Kantona Sarajevo
Prof. dr. Mirjana Malić, s. r.

Na osnovu člana 18. stav (1) tačka b) Ustava Kantona Sarajevo ("Službene novine Kantona Sarajevo", br. 1/96, 2/96, 3/96, 16/97, 14/00, 4/01, 28/04 i 6/13) a u skladu sa članom 28. stav (4) Zakona o poljoprivredi ("Službene novine Federacije BiH", br. 88/07 i 4/10), Skupština Kantona Sarajevo, na sjednici održanoj dana 04.04.2013. godine, donijela je

ZAKON

O IZMJENAMA ZAKONA O NOVČANIM PODSTICAJIMA U POLJOPRIVREDI NA PODRUČJU KANTONA SARAJEVO

Član 1.

U Zakonu o novčanim podsticajima u poljoprivredi na području Kantona Sarajevo ("Službene novine Kantona Sarajevo", broj 1/12) član 10. mijenja se i glasi:

"Član 10.

(Animalna proizvodnja)

U okviru animalne proizvodnje podstiče se:

- farma mliječnih krava koja je u sistemu otkupa mlijeka (provođenje veterinarsko-zdravstvenih, zootehničkih i zoohigijenskih mjera);
- farma mliječnih krava koja nije u sistemu otkupa mlijeka (provođenje veterinarsko-zdravstvenih, zootehničkih i zoohigijenskih mjera);
- vlastiti uzgoj teladi namijenjen daljem tovu (provođenje veterinarsko-zdravstvenih, zootehničkih i zoohigijenskih mjera);
- vlastiti uzgoj priplodnih junica za remont ili proširenje osnovnog stada mliječnih krava (provođenje veterinarsko-zdravstvenih, zootehničkih i zoohigijenskih mjera);
- farma za tov junadi (nabavka podmlatka, provođenje veterinarsko-zdravstvenih, zootehničkih i zoohigijenskih mjera);
- farma ovaca (provođenje veterinarsko-zdravstvenih, zootehničkih i zoohigijenskih mjera);
- farma koza samo u stajskom uzgoju ili pod nadzorom u ograđenim prostorima (provođenje veterinarsko-zdravstvenih, zootehničkih i zoohigijenskih mjera);
- farma za tov svinja (nabavka podmlatka, provođenje veterinarsko-zdravstvenih, zootehničkih i zoohigijenskih mjera);
- farma za tov pilića (nabavka jednodnevnih pilića, provođenje veterinarsko-zdravstvenih, zootehničkih i zoohigijenskih mjera);
- inkubacijska proizvodnja jednodnevnih pilića;

- farma koka nosilja (nabavka jednodnevnih ili osamnaestonedjeljnih pilenki, provođenje veterinarsko-zdravstvenih, zootehničkih i zoohigijenskih mjera);
- pčelinjak (provođenje veterinarsko-zdravstvenih mjera);
- organizovani otkup svježeg mlijeka;
- proizvodnja sirove vune."

Član 2.

Član 14. mijenja se i glasi:

"Član 14.

(Model kapitalnih ulaganja)

(1) U okviru modela kapitalnih ulaganja podstiče se:

- izgradnja objekata započeta u tekućoj godini sa završenim grubim građevinskim radovima preko 50% i to:
 - štalskih kapaciteta za uzgoj goveda, ovaca, koza i svinja za upotrebnu površinu objekta u osnovici (tlocrtu) objekta;
 - štalskih kapaciteta za uzgoj peradi za upotrebnu površinu objekta;
 - za skladištenje, hlađenje ili sušenje primarnih poljoprivrednih proizvoda, koji su proizvedeni u okviru vlastitog poljoprivrednog gazdinstva za upotrebnu površinu objekta;
 - ribnjaka za upotrebnu površinu mrijestilišnih i uzgojnih bazena.
 - rekonstrukcija štalskih objekata za uzgoj goveda, ovaca, koza i peradi započeta u tekućoj godini sa završenim grubim radovima za upotrebnu površinu objekta u osnovici (tlocrtu) objekta, a u cilju usklađivanja s Pravilnikom o mjerama za unapređenje stočarske proizvodnje na području Kantona Sarajevo ("Službene novine Kantona Sarajevo", broj 19/10) (u daljem tekstu: Pravilnik o mjerama unapređenja stočarske proizvodnje).
- (2) U okviru modela kapitalnih ulaganja podstiče se kupovina u tekućoj godini:
- poljoprivrednog zemljišta isključivo za poljoprivrednu proizvodnju, a u cilju povećanja poljoprivredne proizvodnje;
 - novog staklenika ili plastenika;
 - nove poljoprivredne mehanizacije i priključnih sredstava;
 - nove opreme u biljnoj i animalnoj proizvodnji;
 - priplodnih junica za formiranje ili proširenje osnovnog stada mliječnih krava."

Član 3.

(Stupanje na snagu)

Ovaj Zakon stupa na snagu osmog dana od dana objavljivanja u "Službenim novinama Kantona Sarajevo".

Broj 01-02-7994/13
04. aprila 2013. godine
Sarajevo

Predsjedavajuća
Skupštine Kantona Sarajevo
Prof. dr. Mirjana Malić, s. r.

Na osnovu člana 13. stav 1. tačka e) i člana 18. tačka b) Ustava Kantona Sarajevo ("Službene novine Kantona Sarajevo", br. 1/96, 2/96, 3/96, 16/97, 14/00, 4/01, 28/04 i 6/13) i člana 8. Zakona o osnovama socijalne zaštite, zaštite civilnih žrtava rata i zaštite porodice sa djecom ("Službene novine Federacije BiH", br. 36/99, 54/04, 39/06 i 14/09), Skupština Kantona Sarajevo, na sjednici održanoj dana 04.04.2013. godine, donijela je

ZAKON

O IZMJENAMA I DOPUNAMA ZAKONA O SOCIJALNOJ ZAŠTITI, ZAŠTITI CIVILNIH ŽRTAVA RATA I ZAŠTITI PORODICE SA DJECOM

Član 1.

U Zakonu o socijalnoj zaštiti, zaštiti civilnih žrtava rata i zaštiti porodice sa djecom ("Službene novine Kantona Sarajevo", br. 16/02, 8/03, 2/06, 21/06, 17/10 i 26/12) u članu 1. iza alineje 5. dodaje se nova alineja 6. koja glasi:

KM i odgovorno lice u preduzeću ili drugom pravnom licu.

Član 96.

Novčanom kaznom u iznosu od 200,00 KM do 1.500,00 KM bit će kažnjen i građanin odnosno fizičko lice, za prekršaj iz čl. 90. i 91. ovog zakona koji se odnosi na fizička lica.

X - PRELAZNE I ZAVRŠNE ODREDBE

Član 97.

(Početak rada JP Ceste KS)

Skupština će u roku od 30 dana od dana stupanja na snagu ovog zakona donijeti odgovarajuće odluke i poduzeti potrebne radnje za organizaciju i početak rada JP Ceste KS

Član 98.

(Primjena propisa na JP Ceste KS)

Ukoliko ovim zakonom nije drugačije regulisano, na JP Ceste KS će se primjenjivati Zakon o javnim preduzećima Federacije Bosne i Hercegovine ("Službene novine Federacije BiH", br. 8/05, 81/08, 22/09 i 109/12).

Član 99.

(Donošenje podzakonskih akata i pokretanje inicijative za izmjenu zakona)

- (1) U roku od 12 mjeseci od dana stupanja na snagu ovog zakona, Skupština Kantona će donijeti Odluku o uslovima i načinu prokopavanja javnih površina na području Kantona Sarajevo.
- (2) U roku od šest mjeseci od dana stupanja na snagu ovog zakona, ministar je dužan pokrenuti inicijativu za izmjenu Zakona o organizaciji i djelokrugu organa uprave i upravnih organizacija Kantona Sarajevo ("Službene novine Kantona Sarajevo", broj 2/12 - Prečišćeni tekst, 41/12, 8/15, 13/17, 5/20, 51/20 i 14/21) te, donijeti slijedeće podzakonske akte:
Pravilnik o održavanju javnih cesta (član 43.);
Pravilnik o minimalnim tehničkim uslovima za izgradnju i upotrebu stajališta javnog prevoza putnika (član 56. stav (4));
Uputstvo o jedinstvenom načinu obračuna za povrat sredstava na ime naknade za ceste (član 89. stav (3));
Pravilnik o unutrašnjoj organizaciji Ministarstva saobraćaja Kantona Sarajevo.
- (3) Visinu naknada koje proizilaze iz podzakonskih akata iz st. (1) i (2) ovog člana utvrđuje Vlada svojim uredbama.

Član 100.

(Vremensko važenje propisa)

- (1) Danom stupanja na snagu ovog zakona prestaju da važe odredbe člana 10. st. (2) i (3) Zakona o organizaciji i djelokrugu organa uprave i upravnih organizacija Kantona Sarajevo ("Službene novine Kantona Sarajevo", broj 2/12 - Prečišćeni tekst, 41/12, 8/15, 13/17, 5/20, 51/20 i 14/21).
- (2) Stupanjem na snagu ovog zakona, sporazumi i ugovori koje su upravitelji cesta zaključili za poslove održavanja ostaju na snazi do isteka ugovorenog roka.
- (3) Do donošenja podzakonskih akata iz člana 99. ovog zakona, primjenjivat će se podzakonski akti koji su primjenjivani do stupanja na snagu ovog zakona.
- (4) Predmeti čije rješavanje je započelo prije stupanja na snagu ovog zakona rješavaće se prema propisima na osnovu kojih su započeti.

Član 101.

(Ravnopravnost spolova)

Odredbe ovog zakona odnose se podjednako na lica muškog i ženskog spola, bez obzira na rod imenice upotrijebljene u tekstu ovog zakona.

Član 102.

(Supsidijarna primjena propisa)

Na sva pitanja koja nisu regulisana ovim zakonom primjenjuju se odredbe Zakona o cestama Federacije Bosne i Hercegovine.

Član 103.

(Stupanje na snagu)

Ovaj zakon stupa na snagu osmog dana od dana objavljivanja u "Službenim novinama Kantona Sarajevo".

Broj 01-02-47860/21

28. decembra 2021. godine
Sarajevo

Predsjedavajući

Skupštine Kantona Sarajevo
Elvedin Okerić, s.r.lj.

Na osnovu člana 13. stav (1) tačka i) i člana 18. stav (1) tačka b) Ustava Kantona Sarajevo ("Službene novine Kantona Sarajevo", br. 1/96, 2/96 - Ispravka, 3/96 - Ispravka, 16/97, 14/00, 4/01, 28/04, 6/13 i 31/17), Skupština Kantona Sarajevo, na 47. Radnoj sjednici održanoj dana 28.12.2021. godine, donijela je

ZAKON O IZMJENAMA I DOPUNAMA ZAKONA O KONCESIJAMA

Član 1.

(Izmjena člana 2.)

U Zakonu o koncesijama ("Službene novine Kantona Sarajevo", br. 27/11 i 15/13) u članu 2. brišu se riječi: "ili fizičkom".

Član 2.

(Izmjena i dopuna člana 3.)

U članu 3. brišu se riječi: "ili fizičkim", a iza riječi: "Zakonom" dodaju se zarez i riječi: "radi ekonomskog razvoja Kantona".

Član 3.

(Izmjene člana 5.)

U članu 5. u tački c) brišu se riječi: "ili fizičko domaće", a u tački h) brišu se riječi: "ili fizičko".

Član 4.

(Izmjene i dopune člana 6.)

(1) U članu 6. stav (1) mijenja se i glasi:

"(1) Predmeti koncesije prema odredbama ovog zakona su:

- 1) izgradnja i/ili korištenje saobraćajnica u nadležnosti Kantona;
- 2) izgradnja i/ili korištenje hidroenergetskih objekata instalisane snage do 5 MW;
- 3) izgradnja i/ili korištenje postrojenja za pretvaranje pogonske snage vjetra u električnu energiju;
- 4) izgradnju i/ili korištenje postrojenja za pretvaranje energije sunca u električnu energiju;
- 5) izgradnja i/ili korištenje kombinovanih postrojenja za pretvaranje pogonske snage vjetra i energije sunca u električnu energiju;
- 6) izgradnja i/ili korištenje termoelektrana;
- 7) izgradnja i/ili korištenje termoelektrana postrojenja za proizvodnju (primarno) toplote energije;
- 8) izgradnja i/ili korištenje objekata vodoprivrede i vodosnabdijevanja (hidroakumulacije, objekti

- snabdijevanja vodom sa zahvatom vode u količini iznad jedan litar u sekundi, korištenje vodotoka i drugih voda);
- 9) komunalne usluge (vodosnabdijevanje, distribucija gasa, distribucija toplotne energije, pogrebne usluge i dr.);
 - 10) kantonalni i općinski prevoz lica;
 - 11) sve vrste linijskog prevoza putnika na području Kantona;
 - 12) privredno, sportsko i turističko korištenje žičare;
 - 13) korištenje poljoprivrednog zemljišta u državnom vlasništvu;
 - 14) korištenje ljekovitih, termalnih, mineralnih i termomineralnih voda;
 - 15) hidromelioracioni sistemi i sistemi za vađenje materijala iz vodotoka i vodnih površina;
 - 16) istraživanje i/ili korištenje nemetalnih mineralnih sirovina, uključujući sve sekundarne mineralne sirovine propisane posebnim zakonom;
 - 17) istraživanje i/ili korištenje svih vrsta energetskih i drugih mineralnih sirovina, uključujući sve vrste soli i solnih voda utvrđenih posebnim zakonom;
 - 18) odlaganje čvrstog otpada;
 - 19) reciklaža metalnih i nemetalnih otpadaka i ostataka;
 - 20) gospodarenje privrednim lovištima i privredni ribolov;
 - 21) hoteli i ostali turistički objekti;
 - 22) pojedine djelatnosti unutar zaštićenih područja prirode, te za korištenje drugih zaštićenih prirodnih vrijednosti i speleoloških objekata;
 - 23) zdravstvene i farmaceutske usluge u skladu sa Zakonom o zdravstvenoj zaštiti ("Službene novine Federacije BiH", br. 46/10 i 75/13) i Zakonom o zdravstvenom osiguranju ("Službene novine Federacije BiH", br. 30/97, 7/02, 70/08 i 48/11);
 - 24) sportsko rekreativni objekti;
 - 25) druga opća i javna dobra, sadržaji i usluge pogodni za dodjelu koncesije i koji spadaju u nadležnost Kantona, a koji nisu određeni ovim zakonom."
- (2) Iza stava (1) dodaju se novi st. (2), (3) i (4) koji glase:
- "(2) Za predmete koncesije iz stava (1) tač. 2), 3), 4), 5), 6), 8), 12), 13), 14), 15), 16), 17), 20) i 21) resorno ministarstvo je Ministarstvo privrede Kantona Sarajevo (u daljnjem tekstu: Ministarstvo), za predmete koncesije iz stava (1) tač. 1), 10) i 11) resorno ministarstvo je Ministarstvo saobraćaja Kantona Sarajevo, za predmete koncesije iz stava (1) tač. 7), 9), 18), 19) i 22) resorno ministarstvo je Ministarstvo komunalne privrede, infrastrukture, prostornog uređenja, građenja i zaštite okoliša Kantona Sarajevo, za predmete koncesije iz stava (1) tačke 23) resorno ministarstvo je Ministarstvo zdravstva Kantona Sarajevo i za predmete koncesije iz stava (1) tačke 24) resorno ministarstvo je Ministarstvo kulture i sporta Kantona Sarajevo."
- (3) Za predmete koncesije iz stava (1) tačke 25) Vlada Kantona Sarajevo (u daljnjem tekstu: Vlada Kantona) će u konkretnom slučaju posebnim aktom odrediti resorno ministarstvo.
- (4) Pravno ili fizičko lica koje je vlasnik i/ili korisnik mikropostrojenja za proizvodnju električne energije iz obnovljivih izvora energije na području Kantona,

instalisan snage u zbiru do 23 kW, izuzeto je iz obaveze potpisivanja koncesionog ugovora."

(3) Dosadašnji stav (2) postaje stav (5).

(4) Dosadašnji stav (3) postaje stav (6), u kojem se dodaju nove rečenice koje glase: "Nosilac izrade ovog posebnog propisa je Ministarstvo, a priprema ga stručno radno tijelo formirano rješenjem Vlade Kantona, koje čine predstavnici Ministarstva pravde i uprave Kantona Sarajevo i resornih ministarstava iz stava (2) ovog člana, predstavnici jedinica lokalne samouprave i lica iz reda istaknutih stručnjaka iz područja prava. Rok za donošenje ovog posebnog propisa je 12 mjeseci od dana stupanja na snagu ovog zakona."

Član 5.

(Izmjene člana 7.)

U članu 7. u st. (1) i (6) riječi: "Sva ministarstva Kantona" zamjenjuju se riječima: "Ministarstva iz člana 6. stava (2) ovog zakona".

Član 6.

(Izmjena i dopuna člana 8.)

(1) U članu 8. u stavu (1) iza riječi: "Vlade Kantona", brišu se riječi: "Sarajevo (u daljnjem tekstu: Vlada Kantona)".

(2) Iza stava (1) dodaje se novi stav (2) koji glasi:

"(2) U slučaju da, u postupku rješavanja po zahtjevu (samoinicijativnoj ponudi) za dodjelu koncesije iz člana 20. ovog zakona, Vlada Kantona ocijeni opravdanim provođenje postupka dodjele predmetne koncesije putem javnog poziva iz člana 17. ovog zakona, Skupština Kantona Sarajevo donosi odluku o pristupanju dodjeli predmetne koncesije, na prijedlog Vlade Kantona."

Član 7.

(Izmjene člana 15.)

(1) U članu 15. u stavu (1) iza riječi: "ministarstava" dodaju se zarez i riječi: "osim u slučaju zaključenja ugovora o koncesiji po zahtjevu (samoinicijativnoj ponudi) za dodjelu koncesije u kojem ta sredstva osigurava podnosilac ove ponude".

(2) U stavu (2) riječi: "privrede Kantona Sarajevo (u daljnjem tekstu: Ministarstvo)" brišu se.

Član 8.

(Dopune člana 16.)

U članu 16. iza stava (8) dodaju se novi st. (9) i (10) koji glase:

"(9) Ministarstvo uz saglasnost Vlade Kantona donosi pravilnik kojim se detaljnije uređuje postupak dodjele koncesije putem javnog poziva, u roku od šest mjeseci od dana stupanja na snagu ovog zakona.

(10) Rok za okončanje postupka dodjele koncesije putem javnog poziva je 90 (devedeset) dana, a 120 (stodvadeset) dana u slučaju objave međunarodnog javnog poziva i u slučaju iz člana 17. stava (2) ovog zakona."

Član 9.

(Izmjene i dopune člana 20.)

(1) U članu 20. u stavu (2) iza riječi: "oblast koncesije" dodaju se riječi: "koje propisuje resorno ministarstvo".

(2) U stavu (4) riječ: "Ministarstvo" zamjenjuje se riječima: "Resorno ministarstvo".

(3) U stavu (5) broj i riječ: "30 (trideset)" zamjenjuje se brojem i riječi: "15 (petnaest)", a riječ: "Ministarstvo" zamjenjuje se riječima: "resorno ministarstvo".

(4) U stavu (7) riječ: "Ministarstvo" zamjenjuje se riječima: "Resorno ministarstvo", a iza riječi: "ovlaštenje" dodaju se

- riječi: "za pregovore i saglasnost na tekst ugovora o koncesiji".
- (5) U stavu (9) iza riječi: "prije" dodaje se riječ: "urednog".
- (6) Iza stava (9) dodaju se novi st. (10), (11) i (12) koji glase:
- "(10) U slučaju postojanja javnog interesa za dodjelu koncesije Vlada Kantona donosi Odluku o postojanju javnog interesa za dodjelu koncesije u roku od 45 (četrdesetpet) dana od dana prijema urednog zahtjeva za dodjelu koncesije.
- (11) Vlada Kantona na prijedlog resornog ministarstva daje saglasnost na tekst ugovora o koncesiji u roku od 30 (trideset) dana od dana davanja ovlaštenja za pregovore.
- (12) Resorno ministarstvo uz saglasnost Vlade Kantona donosi pravilnik kojim se detaljnije uređuje postupak dodjele koncesije na osnovu zahtjeva (samoinicijativne ponude) za dodjelu koncesije, u roku od šest mjeseci od dana stupanja na snagu ovog zakona. Ovim pravilnikom se propisuju i dokumenti koji su specifični za predmet koncesije, odnosno oblast predmeta koncesije, koji se obavezno dostavljaju uz zahtjev za dodjelu koncesije, kao i dokumenti koje ponuđač obavezno dostavlja općini radi davanja saglasnosti općinskog vijeća za provođenje postupka dodjele predmetne koncesije."
- (7) Dosadašnji stav (10) postaje stav (13), u kojem se riječi: "stava (9)" zamjenjuju riječima: "st. (9) i (10)".

Član 10.

(Izmjene i dopune člana 21.)

- (1) U članu 21. u stavu (1) iza tačke 8) dodaje se nova tačka 9) koja glasi:
- "9) obaveze koncesionara da preuzme sve rizike od nastalih štetnih posljedica korištenjem koncesionog prava,"
- (2) U stavu (1) dosadašnje tačke: 9), 10), 11), 12), 13), 14), 15), 16), 17), 18), 19), 20), 21), 22), 23), 24) i 25) postaju tačke: 10), 11), 12), 13), 14), 15), 16), 17), 18), 19), 20), 21), 22), 23), 24), 25) i 26).
- (3) Iza stava (4) dodaje se novi stav (5) koji glasi:
- "(5) Ministarstvo finansija Kantona Sarajevo uz saglasnost Vlade Kantona donosi pravilnik kojim se detaljno uređuje pitanje mjera finansijskog obezbjeđenja ugovora o koncesiji, u roku od šest mjeseci od dana stupanja na snagu ovog zakona. U postupku donošenja ovog pravilnika, Ministarstvo finansija Kantona Sarajevo obavezno pribavlja i mišljenja resornih ministarstava iz člana 6. stava (2) ovog zakona."

Član 11.

(Izmjene i dopune člana 22.)

- (1) U članu 22. u nazivu člana iza riječi: "koncesija" dodaju se veznik "i" i riječ: "ograničenja".
- (2) Iza stava (1) dodaju se novi st. (2) i (3) koji glase:
- "(2) Rok početka korištenja koncesije ne može biti duži od pet godina od dana zaključivanja ugovora o koncesiji. Samo u izuzetnom slučaju ovaj rok se može produžiti za period do dvije godine.
- (3) Ugovor o koncesiji ne može se zaključiti sa koncesionarom koji nije ispunio u potpunosti sve obaveze iz bilo kojeg zaključenog ugovora o koncesiji sa koncesorom."
- (3) Dosadašnji stav (2) postaje stav (4).

Član 12.

(Izmjene člana 23.)

- (1) U članu 23. u stavu (1) briše se rečenica: "Ugovor o koncesiji se može prenijeti samo ukoliko su ispunjeni uslovi iz ugovora koji se odnose na investiranje."
- (2) U stavu (2) iza riječi: "koncesiji" briše se riječica: "ne".

Član 13.

(Dopuna člana 24.)

- U članu 24. u stavu (2) na kraju rečenice dodaje se riječ: "druga".

Član 14.

(Izmjene i dopune člana 28.)

- U članu 28. u stavu (3) ispred riječi: "datum" dodaju se riječi: "naziv koncesionara, adresa sjedišta koncesionara", a iza riječi: "početka" dodaju se veznik "i" i riječi: "datum završetka".

Član 15.

(Izmjena člana 29.)

- U članu 29. briše se riječi: "ili fizičko".

Član 16.

(Izmjene i dopune člana 32.)

- (1) U članu 32. stav (3) mijenja se i glasi:
- "(3) U slučaju neispunjenja ugovorenih obaveza plaćanja naknade za koncesije, resorno ministarstvo je obavezno poduzimati sve mjere naplate istih kod nadležnih organa, o čemu obavještava Ministarstvo finansija Kantona Sarajevo i koncesora."
- (2) U stavu (4) riječ: "koncesor" zamjenjuje se riječima: "resorno ministarstvo", riječ: "dužan" zamjenjuje se sa riječi: "dužno", iza riječi: "Pravobranilaštvo" dodaje se zarez i riječi: "Ministarstvo finansija Kantona Sarajevo", a riječi: "Ministarstvo finansija" zamjenjuju se sa riječi: "koncesora".
- (3) Iza stava (4) dodaju se novi st. (5), (6), (7) i (8) koji glase:
- "(5) Ministarstvo finansija Kantona Sarajevo dostavlja resornom ministarstvu mjesečne izvještaje o uplatama koje se odnose na korištenje koncesionog prava, a resorno ministarstvo dostavlja koncesoru polugodišnji i godišnji izvještaj o svim pitanjima koja se odnose na predmete koncesije iz svog resora.
- (6) Za predmete koncesije iz odnosne općine, resorno ministarstvo dostavlja općinskom načelniku jedan primjerak zaključenog ugovora o koncesiji, u roku od 15 (petnaest) dana od dana zaključivanja. Ova obaveza odnosi se i na svaki zaključen aneks ugovora o koncesiji.
- (7) Za predmete koncesije iz odnosne općine, resorno ministarstvo dostavlja općinskom načelniku godišnji izvještaj iz stava (5) ovog člana.
- (8) Vlada Kantona dostavlja Skupštini Kantona Sarajevo godišnji izvještaj o stanju provođenja ovog zakona, koje uključuje i pitanja izvršavanja zaključenih ugovora o koncesiji."

Član 17.

(Izmjene člana 34.)

- (1) U članu 34. u stavu (1) riječi: "prirodno bogatstvo, dobro u općoj upotrebi," zamjenjuju se riječima: "predmet koncesije".
- (2) U stavu (3) riječi: "prirodno bogatstvo, dobro u općoj upotrebi" zamjenjuju se riječima: "predmet koncesije".

Član 18.

(Dopune člana 35.)

- U članu 35. iza stava (7) dodaju se novi st. (8), (9) i (10) koji glase:

- "(8) Korisnik predmeta koncesije iz člana 6. stava (1) tačke 4) ovog zakona, koji ima dozvolu za rad, dužan je podnijeti zahtjev za dodjelu koncesije u skladu sa članom 20. ovog zakona u roku od 30 (trideset) dana od dana stupanja na snagu ovog zakona.
- (9) Ako ugovor o koncesiji po zahtjevu iz stava (8) ovog člana ne bude zaključen u roku od 90 (devedeset) dana od dana podnošenja urednog zahtjeva nadležni inspekcijski organ rješenjem će zabraniti korištenje predmeta koncesije.
- (10) Vlada Kantona će, na prijedlog Ministarstva, uredbom propisati korištenje objekata snabdijevanja vodom sa zahvatom vode u količini do jedan litar u sekundi, u roku od šest mjeseci od dana stupanja na snagu ovog zakona. U postupku donošenja ove uredbe, Ministarstvo obavezno pribavlja i mišljenje jedinica lokalne samouprave. Ugovor o korištenju vode iz ovih objekata može se zaključiti na period od pet godina, koji se može obnavljati."

Član 19.

(Stupanje na snagu)

Ovaj zakon stupa na snagu osmog dana od dana objavljivanja u "Službenim novinama Kantona Sarajevo".

Broj 01-02-47859/21 Predsjedavajući
28. decembra 2021. godine Skupštine Kantona Sarajevo
Sarajevo Elvedin Okerić, s. r.

Na osnovu člana 18. stav (1) tačka b) Ustava Kantona Sarajevo ("Službene novine Kantona Sarajevo", br. 1/96, 2/96 - Ispravka, 16/97, 14/00, 4/01, 28/04, 6/13 i 31/17), a u vezi sa članom 8. stav (2) Zakona o privatizaciji preduzeća ("Službene novine Federacije BiH", br. 27/97, 8/99, 32/00, 45/00, 54/00, 61/01, 27/02, 33/02, 28/04, 44/04, 42/06 i 4/09), Skupština Kantona Sarajevo, na 47. Radnoj sjednici održanoj dana 28.12.2021. godine, donijela je

ODLUKU

O DOPUNAMA ODLUKE O PROGLAŠENJU OPĆEG DOBRA I PRIRODNOG BOGATSTVA DIJELOVA PREDUZEĆA KOJIM UPRAVLJA KJKP "GRAS" D.O.O. SARAJEVO I IZUZIMANJU IZ POČETNOG BILANSA I PROGRAMA PRIVATIZACIJE

I
U Odluci o proglašenju općeg dobra i prirodnog bogatstva, dijelova preduzeća kojim upravlja KJKP "GRAS" d.o.o. Sarajevo i izuzimanju iz početnog bilansa i programa privatizacije preduzeća ("Službene novine Kantona Sarajevo", broj 25/21) dodaju se nove podtač. br. 19, 20, 21, 22, 23, 24 i 25 koje glase:

- "19. trafostanicu izgrađenu na k.č. 264 K.O. Sarajevo, Mahala L i i zemljište ispod trafostanice, u površini 167 m² (zk. ul. broj 139);
20. električnu podstanicu sa dvorištem, na k.č. 2231/9 K.O. Gornji Butmir u površini 370 m² (zk. ul. broj 1577);
21. oranicu Stup, pravo korištenja zemljišta na k.č. 2232/10 K.O. Gornji Butmir u površini 165 m² (zk. ul. 3326), na kojoj je izrađena elektrovučna podstanica koja je vanknjižno vlasništvo,
22. dispečersku kuću sa dvorištem, na k.č. 2118/25 K.O. Gornji Butmir, površine 68m² (zk. ul. broj 1832);
23. dispečersku kuću sa zemljištem, na k.č. 2117/7 K.O. Gornji Butmir u površini 37 m² (zk. ul. broj 1832);

24. gradilište na k.č. 1428/23 K.O. Gornji Butmir u površini od 80 m² (zk. ul. broj 7486), na kojoj je izgrađen objekat koji je vanknjižno vlasništvo;
25. gradilište Čengić Vila na k.č. 859/7 K.O. Dolac u površini od 195 m² (zk. ul. broj 18243), na kojem je izgrađen poslovni objekat-dispečerska kuća koja je vanknjižno vlasništvo."

II

Iza tačke I dodaje se nova tačka IIa koja glasi:

"II a

Općinski sud u Sarajevu-Zemljišnoknjižni ured izvršiti će uknjižbu nekretnina iz tačke I ove Odluke, na Kanton Sarajevo."

III

Ova odluka stupa na snagu danom donošenja i objavit će se u "Službenim novinama Kantona Sarajevo".

Broj 01-04-47918/21 Predsjedavajući
28. decembra 2021. godine Skupštine Kantona Sarajevo
Sarajevo Elvedin Okerić, s. r.

Na osnovu člana 18. tačka b) Ustava Kantona Sarajevo ("Službene novine Kantona Sarajevo", br. 1/96, 2/96 - Ispravka, 3/96 - Ispravka, 16/97, 14/00, 14/01, 28/04, 6/13 i 31/17) člana 39. Zakona o ustanovama ("Službeni list R BiH", br. 6/92, 8/93 i 13/94) i čl. 6. i 8. Zakona o imovini Kantona Sarajevo ("Službene novine Kantona Sarajevo", br. 06/97, 09/98 - Presuda Ustavnog suda, 05/10 - Presuda Ustavnog suda i 27/16), Skupština Kantona Sarajevo, na 47. Radnoj sjednici održanoj dana 28.12.2021. godine, donijela je

ODLUKU

O DAVANJU SAGLASNOSTI NA ANEKS SPORAZUMA O POSLOVNOJ SARADNJI

I

Prihvata se tekst Aneksa Sporazuma o poslovnoj saradnji, kojim se regulišu međusobni odnosi na realizaciji projekta rekonstrukcije, finansiranja, ustupanja, opremanja i korištenja objekta predškolske ustanove "Ciciban", sa Općinom Novo Sarajevo i Udruženjem porodica djece i osoba s poteškoćama u razvoju "Dajte nam šansu".

II

Daje se saglasnost v.d. direktorici Javne ustanove "Djeca Sarajeva" da potpiše aneks Sporazuma iz tačke I ove odluke.

III

Odluka stupa na snagu danom donošenja, a objavit će se u "Službenim novinama Kantona Sarajevo".

Broj 01-04-47942/21 Predsjedavajući
28. decembra 2021. godine Skupštine Kantona Sarajevo
Sarajevo Elvedin Okerić, s. r.

Na osnovu člana 13. stav (1) tačka b), člana 18. stav (1) tačka b) Ustava Kantona Sarajevo ("Službene novine Kantona Sarajevo", br. 1/96, 2/96, 3/96, 16/97, 14/00, 4/01, 28/04, 6/13 i 31/17), člana 15. Zakona o zdravstvenom osiguranju ("Službene novine Federacije BiH", br. 30/97, 7/02, 70/08, 48/11 i 36/18) i člana 6. Zakona o ustanovama ("Službeni list RBiH", br. 6/92, 8/93 i 13/94), Skupština Kantona Sarajevo na 47. Radnoj sjednici, održanoj dana 28.12.2021. godine, donijela je



SLUŽBENE NOVINE

KANTONA SARAJEVO

Godina I - Broj 1

Ponedjeljak, 11. marta 1996.
SARAJEVO

Za svaki broj
se pojedinačno određuje
cijena

Na osnovu članova V-1.4. i IX-3(4) Ustava Federacije Bosne i Hercegovine ("Službene novine Federacije BiH", broj 1/94), Skupština Kantona Sarajevo, na sjednici održanoj dana 11. marta 1996. godine, donosi

USTAV KANTONA SARAJEVO

I - OPĆE ODREDBE

Član 1.

Sadržaj

Ovim Ustavom uređuju se organizacija i status Kantona Sarajevo (dalje: Kanton), njegove nadležnosti i struktura vlasti.

Član 2.

Uspostavljanje Kantona

Područje grada Sarajeva koje je razgraničenjem između entiteta u Bosni i Hercegovini izvršenim Mirovnim sporazumom za Bosnu i Hercegovinu potpisanim u Parizu 14. decembra/prosinca 1995. godine (dalje: Mirovni sporazum) pripalo Federaciji Bosni i Hercegovini (dalje: Federacija), organizira se kao kanton sukladno Ustavu Federacije i ovom Ustavu.

Član 3.

Naziv i sjedište Kantona

Službeni naziv Kantona je: Kanton Sarajevo.
Sjedište Kantona je u Sarajevu.

Član 4.

Teritorij Kantona

Teritorij Kantona obuhvata područja općina Centar Sarajevo, Hadžići, Ilidža, Ilijaš, Novi Grad Sarajevo, Novo Sarajevo, Stari Grad Sarajevo, Trnovo i Vogošća, kako je to utvrđeno Mirovnim sporazumom. Ovaj teritorij se bliže utvrđuje posebnim propisom Skupštine Kantona (dalje: Skupština) sukladno federalnim zakonima.

U slučaju izmjena teritorija Kantona odvajanjem dijelova teritorije radi pripajanja kantonima ili pripajanjem dijelova drugih kantona ovom Kantonu, Skupština daje svoje prethodno mišljenje, a radi njegove potvrde može zatražiti i lično i izjašnjavanje građana sa područja Kantona na neki od propisanih načina.

Član 5.

Službeni obilježja Kantona

Kanton ima grb, zastavu, himnu/svečanu pjesmu i pečat, kao i druga obilježja o kojima odlučuje Skupština.

Službeni obilježja Kantona upotrebljavat će se samostalno ili zajedno sa službenim obilježjima Bosne i Hercegovine i Federacije, kako je to određeno njihovim propisima i propisima Kantona.

Za prihvatanje službenih obilježja iz prethodnog stava u Skupštini potrebna je kvalifikovana većina ukupnog broja poslanika.

Član 6.

Odnos prema Bosni i Hercegovini i Federaciji

Sarajevo je glavni grad Bosne i Hercegovine i Federacije, kako je to određeno njihovim ustavima.

Organi vlasti u Kantonu su dužni obezbijediti punu zaštitu interesa Bosne i Hercegovine i Federacije u njihovom glavnom gradu. Oni ne mogu donositi bilo kakve

propise ili druge akte niti preduzimati radnje kojima bi se na bilo koji način ograničavala prava ili narušavali interesi Bosne i Hercegovine ili Federacije na ovom području.

II - ZAŠTITA LJUDSKIH PRAVA I SLOBODA

Član 7.

Utvrđivanje ljudskih prava i sloboda

Na području Kantona obezbjeđuje se puna zaštita ljudskih prava i sloboda utvrđenih Ustavom Bosne i Hercegovine i Ustavom Federacije, kao i u instrumentima datim u Aneksu Ustava Federacije.

Skupština ili bilo koji drugi organ Kantona ne mogu reducirati ljudska prava i slobode utvrđene aktima iz prethodnog stava. Oni su dužni u donošenju propisa i u njihovoj primjeni posebno voditi računa o efektima koje ti propisi imaju ili mogu imati u oblasti ljudskih prava i sloboda.

Član 8.

Zaštita ljudskih prava i sloboda

Skupština će obezbijediti donošenje takvih propisa kojima će se u prvom redu zaštititi utvrđena ljudska prava i slobode, te uvesti efikasni instrumenti te zaštite.

Organi vlasti u Kantonu prilikom izvršavanja propisa su obavezni onemogućiti svako narušavanje ljudskih prava i sloboda, te poduzimati sve potrebne mjere iz svoje nadležnosti radi njihove potpune zaštite. Ovo se posebno odnosi na policijske snage koje će efikasnim, preventivnim i operativnim radom obezbijediti punu ličnu i imovinsku zaštitu svakog građanina.

Član 9.

Komisija za ljudska prava

Radi zaštite ljudskih prava i sloboda i kontrole rada svih organa vlasti Kantona u ovoj oblasti, Skupština obrazuje posebnu Komisiju za ljudska prava.

Broj članova, način njihovog imenovanja te nadležnosti Komisije iz prethodnog stava utvrđuju se posebnim propisom Kantona.

Član 10.

Suradnja sa ombudsmenom i međunarodnim organizacijama

Skupština i drugi organi vlasti su obavezni pružiti ombudsmenu Bosne i Hercegovine, ombudsmenu Federacije i svim međunarodnim posmatračkim tijelima za ljudska prava potrebnu pomoć u vršenju njihovih funkcija na području Kantona.

U okviru pomoći iz prethodnog stava organi Kantona će naročito:

- staviti na uvid sve službene dokumente uključujući i one tajnog karaktera, te sudske i upravne spise;
- osigurati suradnju svake osobe i svakog službenika u davanju potrebnih informacija i podataka;
- osigurati pristup i kontrolu na svim mjestima gdje su osobe lišene slobode, zatvorene ili gdje rade;

d) omogućiti prisustvo sudskim i upravnim postupcima kao i sastancima organa.

Nalazi i izvještaji tijela iz stava 1. ovog člana će se razmatrati u nadležnim organima po hitnom postupku, te će na osnovu toga biti preduzimane odgovarajuće mjere gdje to bude potrebno.

III - NADLEŽNOSTI KANTONA

Član 11.

Određivanje nadležnosti

Kanton ima nadležnosti utvrđene Ustavom Federacije i ovim Ustavom.

U slučaju potrebe za tumačenjem, nadležnosti Kantona utvrđene ovim Ustavom će biti tumačene u korist Kantona po principu predpostavljene nadležnosti, a pojedinačno spomenuta ovlaštenja u ovom Ustavu se neće tumačiti kao bilo kakva ograničenja općih nadležnosti Kantona.

Član 12.

Isključive nadležnosti

U okviru svojih nadležnosti Kanton je nadležan za:

- uspostavljanje i nadziranje policijskih snaga;
- utvrđivanje obrazovne politike, uključujući donošenje propisa o obrazovanju i osiguranje obrazovanja;
- utvrđivanje i provođenje kulturne politike;
- utvrđivanje stambene politike, uključujući i donošenje propisa koji se tiču uređivanja i izgradnje stambenih objekata;
- utvrđivanje politike koja se tiče reguliranja i osiguravanja javnih službi;
- donošenje propisa o korištenju lokalnog zemljišta, uključujući i zavarivanje;
- donošenje propisa o unaprijeđivanju lokalnog poslovanja i dobrotvornih aktivnosti;
- donošenje propisa o lokalnim postrojenjima za proizvodnju energije i osiguranje njihove dostupnosti;
- utvrđivanje politike u vezi sa osiguranjem radija i televizije, uključujući donošenje propisa o osiguranju njihovog rada i izgradnji;
- provođenje socijalne politike i uspostava službi socijalne zaštite;
- stvaranje i primjena politike turizma i razvoja turističkih resursa;
- stvaranje pretpostavki za optimalni razvoj privrede koja odgovara urbanoj sredini;
- finansiranje djelatnosti kantonalnih vlasti ili kantonalnih agencija oporezivanjem, zaduživanjem ili drugim sredstvima.

Član 13.

Zajedničke nadležnosti sa Federacijom

Kanton zajedno sa Federacijom, samostalno ili u koordinaciji sa federalnim vlastima vrši slijedeće nadležnosti:

- jamčenje i provođenje ljudskih prava;
- zdravstvo;
- politika zaštite čovjekove okoline;

- d) komunikacijska i transportna infrastruktura;
- e) socijalna politika;
- f) provođenje zakona i drugih propisa o državljanstvu;
- g) imigracija i azil;
- h) turizam;
- i) korištenje prirodnih bogatstava.

Član 14.

Vršenje nadležnosti

Svoje nadležnosti Kanton izvršava donošenjem sopstvenih propisa i primjenom propisa Bosne i Hercegovine i Federacije.

Nadležnosti iz člana 13. ovog Ustava Kanton vrši u obimu dogovorenom sa federalnim vlastima. U slučaju da takav dogovor ne postoji te nadležnosti će Kanton vršiti cjelovito i samostalno.

Član 15.

Prenošenje nadležnosti

Svoje nadležnosti iz oblasti obrazovanja, kulture, turizma, lokalnog poslovanja i dobrotvornih aktivnosti, radija i televizije Kanton može prenositi na općine u svom sastavu. Ove nadležnosti će se obavezno prenositi na one općine u kojima većinsko stanovništvo prema nacionalnoj strukturi nije stanovništvo koje čini većinu i na području cijelog Kantona.

Kanton može neke od svojih nadležnosti prenijeti i na federalne vlasti, ukoliko bi se na taj način obezbijedilo njihovo efikasnije i racionalnije vršenje.

Odluku o prenošenju nadležnosti u smislu ovog člana donosi Skupština.

IV - STRUKTURA VLASTI

A) ZAKONODAVNA VLAST

Član 16.

Opća odredba

Zakonodavnu vlast u Kantonu vrši Skupština Kantona.

Član 17.

Sastav Skupštine

Skupština je jednodomno predstavničko tijelo sastavljeno od 45 (četrdesetpet) poslanika. Poslanici se biraju tajnim glasanjem na neposrednim izborima na cijelom području Kantona.

Prilikom izbora poslanika obezbjeđuje se odgovarajuća zastupljenost predstavnika Bošnjaka, Hrvata i ostalih naroda proporcionalno nacionalnoj strukturi stanovništva na području Kantona.

Izbor poslanika u Skupštini provodi se sukladno federalnim izbornim propisima, s tim što izbore raspisuje i provodi Skupština.

Mandat poslanika u Skupštini traje 2 (dvije) godine.

Član 18.

Nadležnosti Skupštine

Skupština Kantona:

- a) priprema i dvotrećinskom većinom usvaja Ustav Kantona;
- b) donosi zakone i druge propise u okviru izvršavanja nadležnosti Kantona, izuzev propisa koji su ovim Ustavom ili zakonom dati u nadležnost Vlade Kantona;
- c) bira i razrješava Predsjednika i podpredsjednika Kantona sukladno Ustavu Federacije i ovom Ustavu;
- d) utvrđuje politiku i donosi programe razvoja Kantona;
- e) potvrđuje imenovanje Premijera, zamjenika Premijera i članova Vlade Kantona;
- f) osniva kantonalne i općinske sudove i utvrđuje njihove nadležnosti;
- g) bira sudije kantonalnih sudova sukladno Ustavu Federacije i ovom Ustavu;
- h) usvaja budžet Kantona i donosi zakone o oporezivanju i na drugi način osigurava potrebno finansiranje;
- i) bira zastupnike u Dom naroda Federacije sukladno Ustavu Federacije;
- j) odlučuje o prijenosu ovlaštenja Kantona na općine i Federaciju;
- k) odobrava zaključivanje ugovora i sporazuma u oblasti međunarodnih odnosa i međunarodne suradnje;
- l) provodi istragu sukladno ovom Ustavu i posebnim propisima;
- m) vrši i druge poslove utvrđene federalnim propisima, ovim Ustavom i kantonalnim propisima.

Član 19.

Način rada Skupštine

Skupština bira predsjedavajućeg i dva njegova zamjenika iz reda izabranih poslanika.

Skupština zasijeda javno, izuzev u slučajevima kada je to predviđeno njenim poslovníkom. Izvještaji o zasjedanjima i donesenim odlukama se objavljuju u sredstvima javnog informiranja.

Način rada Skupštine bliže se uređuje poslovníkom.

Član 20.

Poslanički imunitet

Krivični postupak ili građanska parnica ne mogu biti pokrenuti protiv kantonalnog poslanika, niti kantonalni poslanik može biti zadržan u pritvoru ili kažnjen na bilo koji način zbog iznesenog mišljenja i datog glasa u Skupštini.

Član 21.

Način odlučivanja u Skupštini

U vršenju svojih nadležnosti Skupština donosi zakone, druge propise, te opće i pojedinačne akte (dalje: propisi).

